



تیارلان: آی-کتاب

ay-kitap.com



مندرجه

صفحه	عنوان
.....	- مقدمه
.....	- آدم علیه السلام نینگ ذکرى
.....	- اوغوز خان نینگ دنیاگه كېلىشى نینگ ذکرى
.....	- اوغوز خان نینگ خان بولغانى نینگ ذکرى
.....	- اوغوز خان نینگ توران و هندوستانغه يورگانى
.....	- اوغوز خان نینگ ايران و شام و مصر سى يورگه نى
.....	- اوغوز خان نینگ يورتينه كېلىپ توى قىلغانى
.....	- اوغوز خان نینگ اولوغ اوغلى كون خان نینگ پادشاه بولغانى
.....	- اوغوز خان نینگ اوغلان لرى و نبیره لرى نینگ آتلىرى
.....	- كون خان نینگ اينى لرى و اوغلان لرىغه اورون
.....	- اون ايكي يوزلىك و بىگريمه تورى ايماق نینگ معنى سى
.....	- اوغوز خان نینگ نبیره لرى نینگ آت لرى نینگ معنى سى
.....	- اوغوز خان اېلى نینگ عهد قىلغانلىرى نینگ ذكرى
.....	- كون خان نینگ اولوغ اوغلى قايسى نینگ خان بولغانى
.....	- دىب ياقوى نینگ خان بولغانى نینگ ذكرى
.....	- اوغوز خان اېلى نینگ يورت لرى و انده
.....	- اينال ياولى نینگ خان بولغانى نینگ ذكرى
.....	- دويلى قايسى نینگ اينيسى ايركى نینگ پادشاه بولغان ذكرى
.....	- تومن نینگ اوغلى بولغانى و انغه ياولى آت
.....	- تومن نینگ خان بولغانى نینگ ذكرى
.....	- قانلى ياولى نینگ خان بولغانى نینگ ذكرى
.....	- مورياوى نینگ خان بولغانى نینگ ذكرى
.....	- مورياوى اوغلى قراخان نینگ خان بولغانى نینگ ذكرى
.....	- بغرا خان نینگ خان بولغانى نینگ ذكرى
.....	- بغرا خان نینگ اوغلى فوزى تگىن نینگ خان بولغانى نینگ ذكرى
.....	- فوزى تگىن نینگ اوغلى ارسلان نینگ خان بولغانى نینگ ذكرى
.....	- بغرا خان نینگ اولوغ اوغلى ايل تگىن و انىنغ اوغلى
.....	- ايل تگىن اوغلى ايسلى نینگ خان بولغانى نینگ ذكرى
.....	- ايسلى اوغلى شىبان نینگ خان بولغانى نینگ ذكرى
.....	- شىبان اوغلى بوران نینگ خان بولغانى نینگ ذكرى
.....	- على نینگ خان بولغانى نینگ ذكرى
.....	- اوغوز اېلى نینگ على خان غه ياغى بولوب، شاه ملك نى اولتوروب
.....	- ايو باشينه قراخان بولوب تورى طرفغه كېتگه نى نینگ ذكرى
.....	- توغورمىش اوغلى طغرل نینگ خان بولغانى نینگ ذكرى
.....	- ارسلان اوغلى سىرنگ نینگ خان بولغانى نینگ ذكرى
.....	- سالور اوکورجىق آلپ نینگ آته لرى نینگ و اينى لرى نینگ
.....	- سونگ تركمن بولوب و تركمن غه قوشىلغان ايل لرنىنغ ذكرى
.....	- اوغوز ايلينه بىكلىك قىلغان قىزلر نینگ ذكرى



سوز باشی

شجره تراکمه آتلی کتاب، ترکمن خلقی نینگ نسبی، شجره سی، گلیپ چیقیشی، تاریخی، یایران یرلری، مدنیتی، رسم و رواجی باره ده قیمتی معلومات بریان ارزشلی اثر دیر. بو کتابی میلادی 17 نجی عصر دا خبوه خانی ابوالغازی بهادرخان (1603 - 1664 م.) یازیب دیر. بو اثر ده ابوالغازی خان ترکمن خلقی و اونینگ دولتدارلیق تاریخی قديم دورلردن باشلاپ اوز دورینه چه یازیب گورکزیار.

ترکمن خلقی نینگ تاریخی حقیقدا باشقه کوپ اثرلر، جمله دن: دیوان اللغات التترک، الکامل، عجایب البلدان، طبری تاریخی، حدودالعالم، گردیزی تاریخی، جامع التواریخ و روضه الصفا یالی اثرلرده قیمتی معلومات لار بیریلیب دیر. ولی بو کتاب لاردا ترکمن لر حقهده بیریلیان معلوماتلار، کوپ غیسغا بولوب، یاده ایزی گیرلی دال دیر. ابوالغازی خان هم شول کمچیلیگی دویوب «شجره تراکمه» نی یازماغا اورنیغیب دیر. بو تاریخی کتاب لاردان باشغه ترکمن لرینگ آراسینده، بو لارینگ جد اعلی سی بولان - اوغوز خانینگ عمری، ادن ایشلری، اوروش - یوریشلری و اولاد لاری حقهده اینگ ایرکی دورلردن باشلاپ «اوغوز نامه» دییه ن تاریخی - حماسی اثر دۇراپ دیر. اوغوز ناما نینگ متنی عصرلار بویینچا اویتگاپ دیر. اونینگ اسلامدان اۇنگکی متنی بیلن اسلام ظهوریندن سونگکی عصرلاردا دوران متنیده کوپ تفاوتلار گورینیار. ابوالغازی خان اثرینی یازانده بو داستانیگ سونگکی واریانتیندان خیر لانیبیدیر.

ابوالغازی بهادرخان «شجره تراکمه» آتلی کتابینی یازماغا باشلامازدان اۇنگ ، بو اثره دگیشلی کوپ تاریخی اثرلری اوقاپ، انیق و قیمتی مواد جمعلاپ دیر. شونینگ بیلن بیرلیکده، بو کتابی یازماقدا ترکمن لرینگ آرا سینده بار بولان تاریخی منبعلر، شول جمله دن «اوغوز نامه» و «کتاب داده قورقوت» دان گینگ فایده لانیب دیر. شونینگ اوچین اونینگ بو اثری، اوغوز - ترکمن تاریخنا دگیشلی بولان بویله کی تاریخی چشمه لر بیلن دنگ چیقیار. یونه اولارینگ کابیر لری نینگ آراسیندا پادشاه لارینگ آت لارینا و حکمرانلیق ادن بیل لارینا دگیشلی غرشلیقلار ، یالنگیشقلار بار. ابوالغازی کتابی یازانده بو یاغدا لارینگ همه سینی دوزه دیپ دیر.

ابوالغازی خان «شجره تراکمه» ده ترکمن لرینگ همه اوروغلاری، طایفه لاری و دودمان لاری نینگ گچمیشی و تاریخی باره دا دورپ گچمان، بلکه دینگه اوغوز لارینگ بیر بوله گینه نظر تاشلاپ دیر. مثلا بو کتاب دا غزنویلار باره دا اولاری قایی اوروغیندان دیسه ده، اولار باره دا انیق و گینگیشله بین معلومات برماندیر. شونینگ یالی، قراخانیلار، سلجوقلار، قره قویونلی لار، آق قویونلار، افشارلار، عثمانلار، باره ده هم بو اثر ده اوران آز معلومات بار. شجره تراکمه ده کوپراک سالور - آرساری ترکمن لری نینگ شجره سینی گورکزیب و باشغه اوروغ لارینگ شجره سی گورکزیلمان دیر.

هر حال دا بو کتاب اوچیلار اوچین ایکی باقیمدان اهمیتلی دیر: تاریخ و اتنوگرافی باقیمندان، همده ادبی جهت دن. شول اهمیتی نظر دا توتیب، بیز بو قیمتی اثری چاپا تیارلاماغا اورنیقدیق. کتابی ترتیبه سالیب یازانده میلادی 1958 ییلده لینینگراد دا اکادیمسن قونونوف ینگ نشر ادن متینی اساس ادیندیک ، همده 1992 نجی ییلده حرمتلی عالم پ. رجوفینگ کوششی بیلن عشق آباد دا چاپ بولان متندن هم فایدالانیپ، بار بولان یالنگشیق لاری دوزتدیک. آیدیش گیره ک که بو اثر، شول عصرلار ده عموم ترک طایفه لاری نینگ ایچینده رواج بولان «ترکی چغتایی» دیلینده یازیلیب دیر. بیز کتابی چاپ انده اثرینگ دیلینی و سبکینی هیچ خیلی اوزگرتمان مؤلفینگ یازانی یالی املادان خیر لاندیق.

فرستدان فایدالانیب تانیلان عالم اکادیمسن کاندیدی دوکتور محمدیعقوب واحدی جناب لریندان بو کتابینگ لینینگراد دا نشر ادیلن معتبر نسخه سینی بیزینگ اختیاریمیزدا غویانی اوچین تشکر اتیارین. همده بو اثری چاپ اتمکده مالی یاردم بره ن دوست لاردان مندارلیغیمی بیلدیریارین. ومن الله توفیق.

پوهندوی محمدصالح راسخ یلدرم
بلخ یونیورسیتی سی نینگ استادی

مزار شریف - 1388



آدم عليه السلام نینگ ذکری

خداوند تعالی فرشته لرگه آیتدی کیم - تورپاقدین کیشی یسب، جان بیریپ، یر یوزینده اوز اورنومغه خلیفه قلیپ قویاتورور من، تیدی. ایرسه فرشته لر آیتدیلر: انلر یوقاری توشک بیرلن قویغی توشکنی ضبط قیله بیلسه لر اول سبب دین سینگه عاصی بولورلر، پراتمغه نینگ اولی تورور. خداوند تعالی دیدی: من بیلگننی سیزلر بیلمس سیزلر، بارینگلر، تورپاقدین بیر کیشی نینگ صورتین یسنگلر، تیدی. عزرائیل خدایتعالی نینگ امری بیلن برچه یر یوزینده گی هر تورلوک تورپاقدین آلیب مکه معظمه بیرلن طایف نینگ اراسینده تورپاقدی پالچیق قلیپ آدم نینگ صورتینی یسب یاتغوزدیلر. بیر نیچه ییل لر اوتگن دن سونگ خدای تعالی انگه جان بیردی و مینگ ییل بو دنیا ده تورودی. «آدم» تیمکلیک عرب تیلی تورور. عرب تیری نی آدم دیر، هر نیملرسه نینگ تاشینی «تیری» دیرلر. فرشته لر تورپاقدی بیرنی قازیب ایچیندین آلمه دیلر، تاشیندین آلیب آدم نینگ صورتینی یسه دیلر. آتینگ اوچون آدم تیدیلر، آنلر نینگ بهشتغه بارغان لری و اندین چیقانلری و بیر یوزیده یورگلری نینگ حکایت لری خلق ایچینده مشهور تورور، انینگ اوچون آیتمه دوق.

آدم علیه السلام اولر بولدی، ایرسه شیث آتلی اوغلیغه آیتدی کیم میندین سونگ، سین مینینگ اورنیمغه اولتوروب اوغلانلریمغه باش بولغیل، تیب نصیحتلر قیلدی. بو دنیا دین او دنیا غه کیتدی. اندین سونگ جبرائیل (ع) خدایتعالی دین شیث (ع) غه کتاب آلیپ کیلدی. شیث (ع) هم پیغمبر و هم پادشاه بولوب، ایلگه عدالت قلیپ توقوز و اون ایکی (912) ییل بو دنیا ده توروب جنت سراپیغه کیتدی. شیث (ع) نینگ معنسی خدای تعالی نینگ هیتی تیمک بولور.

شیث (ع) اولر وقتیده اوغلی انوش نی اورنیده اولتورتوب کیتدی، انوش تقی آته سی و اولوغ آته سی نینگ شریعتیغه عمل قلیپ، اول تقی آته سی تیک توقوز یوز اون ایکی (912) ییل بو منزله اولتوروب، اول منزله کیتدی. انوش نینگ معنسی صادق تیمک بولور. انوش تقی اولرینده اوغلی قینان نی اورنیده اولتورتوب کوپ نصیحت و وصیت قیلدی. اول تقی سکیز یوز و قیرق (840) ییل آته سی یورگن یولگه یوریپ اوغلی مهلائیل نی اوز بیرینده اولتورتوب تینگری یقینیغه کیتدی. مهلائیل زمانینده آدم فرزند کی کوپ بولدی، اولتورغان بیریه سیغیشمه دیلر. اول سبب دین مهلائیل بابل اقلیمیغه باریب بیر شهر سالدی، آتینی «سوس» قویدی. تام و ایو سالدی و کیند (کینت) لر قیلدوردی. اندین ایلگه ری شهر و کیند و ایو یوق ایردی و تاغلر قواقینده و یا جنگل ده اولتورور ایردیلر. خلققه حکم قیلدی، بیر یوزیغه بابیلینگ، تیب، برچه آدم فرزندلری مهلائیل امری بیرلن باریب هر قایده مناسب بیر بولسه، کیندلر سالدیلر. مهلائیل توقوز یوز و بیگرمه (920) ییل «سوزلا» تورغان شهرده توروب، اوغلی بردنی اوز پرینده اولتورتوب، «دم اورماس» شهریغه کیتدی. برد توقوز یوزو آلتیمش (960) ییل بو یورته اولتوروب اوغلی اخنوخ نی یورنیده قویوب کوچمس و قونماس یورتیغه کیتدی. اوغلی نینگ آتی اخنوخ ایردی و لقبی ادریس، خدایتعالی انی پیغمبر قیلدی. سکسان ایکی ییل پیغمبرلیق قیلدی، خلقتی توغری یول غه اونده دی. سونگ تینگری تعالی امری بیرلن عزرائیل (ع) کیلیپ ادریس نی یرینگ اوستیده قویوب بهشتغه آلیپ باردی. اول کوندین تا بو وقتغه چه بهشت ده تورور. ادریس (ع) بهشتغه بارغاندین دین سونگ اوغلی متوشلخ آته سی اورنیده اولتوردی، داد وعدل قیلدی، عمری نینگ سانی معلوم ایرمس. اول تقی آته سی بارغان بیر غه باردی. اندین سونگ متوشلخ اوغلی لیمک آته سی بیرینده اولتوروب کوپ ییل لر داد و عدل قیلدی، تقی آته سی کیتگن یولغه توشوب کیتدی. انینگ هم عمری معلوم ایرمس. اندین سونگ اوغلی نوح (ع) پیغمبر آته سی اورنیده اولتوردی. خدایتعالی ایکی یوز و ایللیک یاشیغه یتگنده پیغمبرلیک بیردی. بیت یوز ییل خلقتی توغری یولغه اونده دی. ایر و خاتوندین سکسان دین آرتوق کیشی ایمان کیلتورمه گانیغه اچیغله نیب خلققه دعای بد قیلدی. جبرئیل (ع) کیلدی، تقی آیتدی کیم خدای تعالی سنینگ دعانگی قبول قیلدی، فلان و قتده خلقتی سوو غه غرق قیلور بولدی، سین کیمه یسه غیل تیب، کیمه نی نیچوک یسارین کورستدی. بیردین سوو چیقدی، آسماندین یامغور یاغدی، بیر یوزینده کی جانلی نینگ برچه سی غرق بولدی. نوح (ع) اوچ اوغلی و ایمان کیلتورغان سکسان کیشی بیرلن کیمه غه میندی، بیر نیچه آی دین سونگ بیر خدایتعالی نینگ امری بیرلن سوونی تارتدی، کیمه «موصل» تیگن شهر نینگ تقی یقینینده «جودی» تیگن تاغ دین چیقن کیشی لرنینگ برچه سی بیمار بولدیلر. نوح پیغمبر اوچ اوغلی و اوچ کیلینی بیرلن یخشی بولدیلر، اندین اوزگه کیشی لر نینگ برچه سی اولدیلر. اندین سونگ نوح (ع) پیغمبر اوچ اوغلی نینگ هر قیسی سین بیر بیرگه بیباردی، حام آتلی اوغلینی هندوستان بیریه بیباردی، سام آتلی اوغلینی ایران زمینیه بیباردی و یافث آتلی اوغلینی شمالی قطب طرفیه بیباردی. اوچیغه هم آدم فرزندلرین سیز اوچنیگیز دین اوزگه کیشی قالمه دی،



ایمدی اوچونگیز اوچ یوتده تورونگ، هر قچان اوغلان - اوشاقینگیز کوپ بولسه، اول بیرنی یورت قلیلب اولتورونگ تیدی. یافث نی بعضی لر پیغمبر ایردی تیب تورورلر و بعضیلر پیغمبر ایرمس تیب تورورلر. یافث آته سی نینگ حکمی بیرلن جودی تاغیدین کیتیب اتل و یاییق سوو یقاسیغه باردی. ایکی یوز و ایلک (250) ییل انده توردی، تقی وفات بولدی. سکیز اوغلی بار ایردی، اولادی بسیار کوپ بولوب ایردی. اوغلان لار نینگ آت لری مونلر تورور: ترک، خزر، سقلاب، روس، منگ، چین، کماری، و تارخ.

یافث اولرینده، اولوغ اوغلی ترکنی اورنینه اولتوریدی اوزگه اوغلان لریغه آیتدی کیم ترک نی اوزینگیزغه پادشاه بلیب، انینگ سوزیندین چقمه نگ، تیدی. ترک غه «یافث اوغلانی» دیب، لقب قویدیلر، بسیار ادبلیک و عاقل کیشی ایردی. آته سیندین سونگ، بیرلرینی یوردی و کوردی، تقی بیر بیرینی خوشلب انده اولتوروب، بو کون اول بیرنی «ایسیغ کول» دیرلر، خرگاه اوپونی اول چیقاردی. ترک لر ایچینه کیم بعضی رسم لر بار، اندین قالدی.

ترک نینگ تورت اوغلی بار ایردی : اول - توتک، ایکینچی - چگل، اوچونچی برسجار، تورتنچی املاق. ترک اولر بولغانیده توتک نی اوز اورنیغه پادشاه قلیلب اوزاق سفر غه کیتدی. توتک عقلی و دولتی یخشی پادشاه ایردی، ترک ایچینه کوپ رسم لر نی اول پیدا قیلدی. عجم پادشاه لری نینگ اولی - کیومرث بیلن معاصر ایردی. کونلردن بیر کون آغه چقیب کییک اولتوروب، کباب قلیلب اییب اولتوروب ایردی، ایلکیدین بیر توغرام ات بیر گه توشدی، آنی آلیب ییدی، ایرسه آغزیغه بسیار خوشمزه کیلدی، انینگ اوچون اول بیر توزلاق ایردی. آشغه توز سالماقنی اول چیقاردی، بو نمکین رسم اندین قالدی. ایکی یوز و قیرق (240) ییل عمریدین اولتورون سونگ اوغلی املجه خاننی اوز بیرینده اولتورتوب، بارسه کیلمس تیگن شهرگه کیتدی. املجه خان تقی کوپ ییل لر پادشاه لیق قلیلب، آشلرینی آشب، یاشلرینی یشب، آته سی کیتیدین کیتدی. اولر وقتینده اوغلی باقوی دیب خاننی اورنینه اولتورتتی. «دیب» نینگ معنیسی تخت نینگ بیر «باقوی» معنیسی - ایل اولوغی تیمک تورور. اول تقی کوپ ییل لر پادشاهلیق قلیلب دوست لری نینگ کولگه نین، دشمن لرنینگ بیغله غانین کوروب، سوپونوب، اندین سونگ اولر بولغانده اوغلی کوک خاننی تختینده اولتورتوب اولدی. اول تقی کوپ ییل لر پادشاهلیق قیلدی. آته سی یولیندین تشقری چقمه دی. خسته بولدی، ایرسه اوغلی النجه خاننی اوز بیرینده اولتورتوب، اوزاق سفرغه کیتدی. اول تقی کوپ ییل لر پادشاهلیق قیلدی، آته لرنین ولایت لری، ایل و اولوسلری کوپ بولدی. انینگ ایکی اوغلی بولدی: بیرنی نینگ آتی تاتار و بیرنی نینگ آتی مغول، آته سی قاری بولغاندین سونگ یورتینی ایکی بولوب، ایکی اوغلیغه بیریب وفات بولدی. النجه خان اولگندین سونگ تاتار و مغول هر قیسی سی اوز بیرلرینده پادشاهلیق قیلدیلر. مغول خان نینگ تورت اوغلی بار ایردی: اولغی نینگ آتی قراخان، ایکینچی گور خان، اوچونچی قیرخان، تورتنچی اورخان. مغول خان اولوغ اوغلی قرا خانغه یورتینی بیریب، برچه نینگ براتورغان یورتیغه کیتدی. قرا خان اور تاغی و کر تاغینی یایلر ایردی، بو چاغ ده انی اولوغ تاغ و کیچیک تاغ دییورتورلر، قیش بولغانده «سیر» سووی نینگ اداقی و قراقوم و بورسوقنی قیلر ایردی.

اوغوز خان نینگ دنیاغه کیلگه نی نینگ بیانی

قراخان نینگ اولوغ خاتونیدین بیر اوغول بولدی. کورکی آی و کوندین آرتوق، اوچ کیچه و کوندوز آنه سینی ایمه دی. هر کیچه، اوغلان آنه سی نینگ توشیغه کیریپ آیتور ایردی: ای آنه، مسلمان بولغیل، اگر بولمه سنگ، اولسم اولرمن سنینگ ایمچینگینی ایمس من، تیب ایردی. آنه سی اوغلینی قیا بیلمه دی، تقی تنگری نینگ بیرلیگینه ایمان کیتوردی و اندین سونگ اول اوغلان ایمچه گین ایمدی و انه سی کورگن توشینی و مسلمان بولگه نینی کیشیغه آیمه دی، تقی یاشوردی، انینگ اوچون کیم ترک خلقی یافث دین تا النجه خان زمانیه چه مسلمان ایردیلر. النجه خان پادشاه بولغاندین سونگ خلق باشی و مالی کوپ بولدی. دولته ایسردیلر، تقی تنگری نی اونوتدیلر و برچه ایل کافر بولدیلر و قراخان زمانیه کافرلیکده انداغ محکم ایردیلر کیم اگر آته سی مسلمان بولغانین ایشیتسه، اوغلی اولتورور ایردی و اوغلی نینگ مسلمان بولغانین ایشیتسه آته سی اولتورور ایردی. اول چاغ ده مغول نینگ رسمی انداغ ایردی کیم تا اوغلان بیر یاشیغه یتمه گونچه آغه آت قویمس ایردیلر. اوغلان بیر یاشیغه بیئتدی، ایرسه قراخان ایلگه ساوون سالدی، تقی اولوغ توی قیلدی. توی کونی اوغلاننی معرکه ایچیگه کیتوروب، قرا خان بیکلریگه آیتدی: بیز نینگ بو اوغلیمیز بیر یاشیغه بیئتدی، ایندی مونغه قه ات قویرسیز تیب، بیکلر جواب بیرمسدین بورون، اوغلان آیتدی: منینگ آتیم «اوغوز» تورور، بیت:



اوشول بیر بئر اوغلان انده روان
 آتیم تور «اوغوز» خسرو نامور
 کیلیب تیلگه تیدی بولینگلر عیان
 بیلینگلر یقین برچه اهل هنر
 توپغه کیلگن اولوغ و کیچیک برچه اوغلان نینگ بو سوزیگه تانگ قالدیلر، تقی آیتدیلر کیم بو اوغلان
 نینگ اوزی آتینی آیه تورور، موندین یخشی آت بولورمو تیب، آتینی «اوغوز» قویدیلر. تقی آیتدیلر کیم بیر بئر
 اوغلان نینگ مونداغ سوزنی سوزله گانینی هیچ زمانده هیچکیم اشیگن و کورگن یوق تورور تیب، انی ایریم
 ایتیب آیتدیلر کیم بو اوزاق عمرلی و اولوغ دولتی و اوجی اوزاغان و یانی یازیلغان بولغوسی تورور تیدیلر.
 اوغوز نینگ تیلی چیقوب یورگه نینده «الله، الله» دیب، همیشه آتور ایردی، انی هرکیم ایشیتسه، آتورلر ایردی:
 اوغلان تورور، تیلی کیلمس لیگیندین نه آتورین بیلمه تورور، دیرلر ایردی. انینگ اوچون کیم لفظ «الله»
 عرب تیلی تورور، مغول نینگ هیچ اته سی عرب تیلینی اشیگن ایرمس. اوغوزنی خدایتعالی مادرزاد ولی یره
 تیب ایردی، انینگ اوچون کونگلینه اوزی نینگ آتینی ساله تورور ایردی. چون اوغوز بیگیت بیتیشدی، ایرسه
 قراخان اینیسی گورخان نینگ قیزی آلیب بیردی. اوغوز کیشی یوقده قیزغه آیتدی: عالمنی، سینی، بیزنی یره
 تقان بار، انینگ آتی «الله» تورور، انی بار بیلگیل، انینگ بویورغانیندین اوزگه ایشنی قیلمه غیل، تیدی. ایرسه
 قیز انی قبول قیلمه دی، شول زمان قویدی، تقی قیزدین باشقه یاتدی، کیچه لر باشقه یاتیب، کوندوز سوزلشمس
 ایردی. بیر نیچه وقتدین قراخانغه آیتدیلر کیم اوغلونگیز کوچینی سیومه ی تورور، سیومس لیگیندین، آلگن
 کونیدین بیر ییره یاتمه ی تورور، تیدیلر. ایرسه قراخان بو سوزنی ایشیتگندین سونگ، تقی بیر اینیسی
 قیرخان نینگ قیزی آلیب بیردی. انگه هم ایمان عرض قیل، تیدی. اول قیز هم قبول قیلمه دی. انینگ بیرلن هم
 بیر یره یاتمه دی. بو واقعات دین بیر نیچه ییل اوتگندین سونگ اوغوز خان آغه چیقوب، قیتیب کیلور ایردی،
 کوردی کیم سوونینگ یقاسینده بیر نیچه ضعیفه لر کیر یوه تورورلر. اته سی اینیسی اورخان نینگ قیزی مونلر
 نینگ ایچینده اولتوروب تورور، قیزغه کیشی بیباردی سوزلشمک که، شرم اشکارا بولور تیب قورقتی، تقی
 قیزی گوشه گه چارلب آنت بیریب آیتدی کیم آتم منغه ایکی قیز آلیب بیردی، آنلرنی سیومه گه نیم نینگ سبی بو
 کیم من مسلمان، انلر کافر، هرچند مسلمان بولونگ، تیدیم، قبول قیلمه دیلر. اگر سن مسلمان بولسنگ ایردی،
 سینی آلور ایردیم تیدی، ایرسه قیز، سن نه یولده بولسنگ، من شو یولده بولایین، تیدی. اندین سونگ اوغوز خان
 اته سیغه آیتدی، اته سی اورخان نینگ قیزی اولوغ توی قیلیب اوغوزغه آلیب بیردی. اول قیز مسلمان بولدی و
 اوغوز انی کوپ سیور ایردی.

موندین کوپ ییل لر اوتدی، بیر کون اوغوز بیراق بیرگه آغه کیتدی، قراخان برچه کوچ لرین و کیلین
 لرین چقیریب ایردی. تقی سوزله شیب اولتورغانده خاتونیندین سوردی کیم مونینگ سبی نه تورور، اوغوز
 سونگی آغان خاتونینی سیور و بورونگی آغان ایکی خاتونی نینگ قاتیغه هیچ بارمس. خاتونی ایدی : من بیلمه
 یمن، کیلین لر یخشی راق بیلور، تیدی. خان کیلین لریدین سوره دی، ایرسه اولوغ کیلین آیتدی: اوغلونگیز
 مسلمان بولوب تورور، بیز ایکیمیز گه مسلمان بول، تیدی، قبول قیلمه دوق، کیچیک کلینیگیز مسلمان بولوب
 تورور، انینگ اوچون اوغلونگیز انی کوپ سیوه تورور، تیدی. قراخان بو سوزنی ایشیتگندین سونگ، بیک
 لرینی چقیریب کینگاشتی. تقی سوزنی مونگه قویدیلر کیم اوغوزنی آو ده یورگنده توتوب اولتورگه یلر. قراخان
 ایلگه کیشی بیباردی، تیز کیلسونلر، آغه چیقوب من تیب، بو سوزنی اوغوز خان نینگ کیچیک خاتونی اشیتب
 قراخان نینگ قیلغان کینگاش لری نینگ برچه سین آیتیب، اوغوز خان غه کیشی بیباردی. اوغوز خان تقی بو
 سوزنی ایشیتگندین سونگ ایلگه کیشی بیباردی، آتم چریک تارتیب منی اولتورگالی کیله تورور. من تیگن منگه
 کیلینگ، آتمنی تیگن آتمگه بارینگ تیب، ایل نینگ کوپی قراخان غه باردی، آزاراغی اوغوز خان قاتیغه باردیلر.
 قراخان نینگ اینی لری نینگ کوپ اوغلان لری بار ایردی، انلرنی قراخان دین ایریلور تیب هیچ کیم نینگ
 کونگلغه کیلمس ایردی. انلرنینگ برچه لری اوغوز خان قاتیغه کیلدیلر. اوغوز خان انلرغه «اویغور» آت
 قویدیلر. اویغور - ترکی تیلی تورور، معنی سی برچه غه معلوم تورور، یاپیشغور معنی سینه تورور. آتورلر
 سوت اویدی، سوت ایرکه نینده بیر ییری بیریندین ایریلور ایردی، قتیق بولغاندین سونگ بیر ییری غه یاپیشه
 تورور. بو تقی آتورلر کیم امامغه اویدیم، امام اولتورسه اولتوره تورور، تورسه توره تورور، پس یاپیشقانی
 بولمس مو؟ انلر کیلیب اوغوز خان نینگ ایه گینه ایکی قول لری بیرلن محکم یاپیشدیلر، ایرسه خان
 انلرغه «اویغور» تیدی. یاپیشغور تیمک بولور.

قراخان بیرلن اوغوز خان ایکی صف تارتیب اوروشتیلر، خدای تعالی اوغوز خاننی غالب قیلدی،
 قراخان قاچتی، اوروشده قراخان نینگ باشیغه اوق تیگدی، کیم آغانین بیلمه دیلر، قراخان اول یاره دین اولدی،
 اوغوز خان اته سی نینگ تختینده اولتوردی.

اوغوز خان نینگ خان بولغانی نینگ ذکرى

اوغوز خان، ایل نینگ برچه سینی مسلمانلیقه دعوت قیلدی. مسلمان بولغانلرنی سیله دی و بولماغانلرنی چاپتی، اوزلرینی اولتیردی، اوغلانلرینی اسیر قیلدی. اول وقتده قراخانغه تعلق ایل دین باشقه ایل لر کوپ ایردی. هر اولوغ ایل نینگ بیر باشقه پادشاهی بار ایردی. کیچیک ایل انلرغه قوشولور ایردی. قراخان نینگ مسلمان بولغان ایل لری اوغوز خانغه قوشولدی. اوغوزخان هر ییلده مغول یورتینده اولتورغان ایل لر بیرلن اوروشور ایردی، تقی غالب کیلور ایردی. آخر برچه سینی آلدی و قاجیب قوتولغانلری تاتار خانینه باریب سیغیندیلر. تاتار اول وقتده «جورجت» غه یقین اولتورور ایردی. جورجت نیکن بیر اولوغ یورت تورور، شهر لر و کیند (کینت) لری کوپ، ختای نینگ تیمور قازیق طرفینده بولور. هندی و تاجیک انی «چین و ماچین» دیرلر، اوغوز خان باریب تاتارنی چاپتی، تاتار خان کوپ چریک بیرلن کیلیب اروشدی. اوغوز خان باسدى، تقی لشکرینی قیردی. اوغوزخان نینگ لشکری نینگ قولینه اولجه لی اولوک مال توشتی کیم یوکلە مگه کولک آزلیق قیلدی. بیر یخشی چپیر کیشی بار ایردی، اول فکر قیلیب ارابه نی یسه دی. اندین کورمکچه برچه ارابه یسب اولجه یوکلە قیدیلر، ارابه غه «قانیق» آت قویدیلر، اندین ایلگری آتی ده یوق ایردی، اوزی ده یوق ایردی. انینگ اوچون قانیق تیدیلرکیم یوروگنده قانیق - قانیق قیلیب آواز قیلور، انی یسه گن کیشینی «قانیقلی» دیرلر. برچه قانیقلی ایلی اول کیشی نینگ اوغلان لری تورور.

اوغوز خان یتمیش ایکی ییل غه چه مغول و تاتار اوز سنکاکى ایردی، انلر بیرلن اوروشتی، یتمیش اوچ ییل بولغانده برچه سینی اوز آغزیغه باقتوری و مسلمان قیلدی. اندین سونگ یوروب ختای نی آلدی و جورجت نی آلدی و تقی تونقوت نی آلدی، تونقوت نی تاجیکلر «تبت» دیرلر. اندین سونگ باریب قره ختای نی آلدی، اول هم اولوغ یورت بولور، کیشی سی نینگ چهره سی هندو تیک قرا بولور. هندوستان بیرلن ختای نینگ اره سینده محیط تینگیزی نینگ یقاسینده بولور. تاقوت نینگ قیش بولغانده کون توغیشی و یای بولغانده توشلوقینده بولور. ختای نینگ نری یوزینده تینگیز یقاسینده بیرک تاغلر نینگ ایچنده کوپ ایل لر بار ایردی، انینگ پادشاهی نینگ آتینی «ایت براق خان» دیر ایردیلر، انینگ اوستینه آتله نیب باردی، اوروشدیلر، ایت براق خان غالب کیلدی، اوغوزخان قاجتی، اوروشقان بیرى نینگ نری یوزینده آقیب باره تورغان ایکی اولوغ سو بار ایردی. اول ایکی سو نینگ آره سینده بیر نیچه کون توروب، قاجقان لشکری نینگ آلدین - آرتین بیغدی. اولوغ پادشاه لر نینگ عادت لری تورور، اوزاق سفرغه بارکنده کوچلرین آلیب بارماق، نوکر خلقی نینگ هم بعضی آلیب بارور. اوغوز خان نینگ بیر بیکی کوچین آلیب باریب ایردی، اوزی اوروشده اولدی، خاتونی قوتولیب ایکی سو نینگ اره سینده خان کتیدین بیتدی. یوکلای ایردی، تولغاغی توتتی، کون ساووق ایردی، کیرمکگه اوپو یوق، چپریک آغاچ ایچنده اوغلان توغوردی، مونی خانغه معلوم قیلدیلر، ایرسه خان ایتدی: مونینگ آته سی بیز نینگ آلدیمیزده اولدی، غمخواری یوق تیب اوغول اوقوندی، آتینی «قیچاق» قویدی. قدیم ترک تیلینده ایچی بوش آغاجنی قیچاق دیرلر ایرکن دورلر. انینگ اوچون اول اوغلان آغاچ ایچنده توغدی تیب آتین «قیچاق» قویدیلر. بو وقتده ایچی بوش آغاجنی «جپاق» دیتورورلر. قرا خلق نینگ تیلی کیلمس لیگیندین «قاف» نی «جیم» اوفیتورور، شول قیچاق تورور، جیپاق دیتورورلر. اول اوغلاننی خان اوز قولینده سقله دی، ییگیت بولغاندین سونگ اوروس، اولاق و ماجار و باشقیرد ایل لری یاغی ایردیلر، قیچاققه کوپ ایل و نوکر بیریب اول یاققه تین و اتل سووی نینگ یقاسیغه بیباردی. اوچ یوز ییل اول بیرده قیچاق پادشاهلیق قیلیب اولتوردی، برچه قیچاق ایلی انینگ نسلیندین تورور. اوغوزخان زمانیندین تا چنگیز خان زمانیغه چه تین و اتل و یاییق و بو اوچ سوو یقاسینده قیچاق دین اوزگه ایل یوق ایردی. تور ت مینگ ییل گه چه اول بیرده اولتوردیلر، انینگ اوچون اول بیرنی «دشت قیچاق» دیرلر. چنگیزخان ایران و توران اوستینه کیلغانده بو یورت لر نینگ پادشاهی سلطان محمدخوارزمشاه تیگن ایردی، انینگ پایتختی اورگنج ایردی. چنگیز خان بیرلن اوروشه بیلمه ی، قاجیب مازندران کیتدی. چنگیزخان بخارا و سمرقند و تاشکنت نی آلیب عراق و گیلان و مازندران و آذربایجان و گرجستانغه جبه نوین و سبودای بهادر تیگن ایکی بیگینی باش قیلیب اوتوز مینگ کیشی بیرلن بیباردی. سلطان محمد خوارزمشاه نینگ پایتختی و نوکر و خزینه سی نینگ تورغان بیرى تور تیب اولوغ اوغلی جوجی خان و ایکیچی اوغلی چغتای خان و اوچونچی اوغلی اوگدای خان و اوچینچیسی نی سکسان مینگ کیشی بیرلن اورگنج گه بیباردی. اورگنج ده پادشاه یوق ایردی. سلطانلر دنیا و دینی اوچون سکیز ای شهرده توروب اوروشدیلر، توقوزینچی آیده چنگیزخان نینگ اوغلانلری شهرنی آلدیلر، تقی خلقتی قتل عام قیلیب، چغتای بیرلن اوگدای قیتیب ترمز ده آته سی خدمتیغه باردی. جوجی اوزیگه تعلق نوکری بیرلن اورگنج دین دشت قیچاققه باردی. قیچاق



خلقى بېغىلاپ اوروشدىلار، جوجى خان باسدى، تقى قىپچاق نىنگ قولگە توشگە نىن اولتوردىلار. قوتولغانى ايشتك غە باردى، ايشتك نىنگ كوپ راغى بول وقتە شول قىپچاق نىنگ نسليندىن تورور. اتل بىرلن تىن سووى نىنگ اراسينده اولتورغان قىپچاقلار تور ت طرفغە قاچىپ كىتىدىلار، كوپراغى چركس و تومان يورتيغە باردىلار. جوجى خان قىپچاق نىنگ اوغلان - اوشاغىن اولجە قىلىپ، قىچاق يورتينده اولتوردى. مغولدين اويونىنگ و آتە سى بىرگن ايل لرنىنگ برچە سىن كىلتوردى. اوزبىك نىنگ هر اوروغىندىن قىچاق يورتيغە كوچىپ كىلدىلار. اندىن سونگ جوجى خان اولدى ويورت اوغلى ساين خانغە قالدى. جوجى خان اوغلانلرىندىن بىگرمە تور ت كىشى اول يورته پادشاهلىق قىلدىلار. انىنگ زمانينده اول يورتنى «ساين خان يورتنى» دىرلر ايردى. اندىن سونگ اول يورت منغيت غە توشدى. انلرنىنگ اولى آق منغيتلى «قوتلى قىالى» نىنگ اوغلى «ايدك بى» تىگن ايردى. اندىن سونگ منغيت يورتنى تىدىلار. تاريخ مىنگ تقى قىرق (1040) ده آرغە طرفىندىن قالماق ايليندىن پادشاهى نىنگ آتى «اورلوك» اون مىنگ ايولىك كىلىپ منغيت يورتنىده اولتوردى. بو كون تاريخ مىنگ ده يتمىش بىر (1071) ده و سىچقان يىلى تورور. ايمدى اول يورتنى «قالماق يورتنى» دىيتورورلر. بلى بو دنيا بىر رباط غە اوخسر، آدم فرزندلرى كاروانغە اوخسرلر، بىرى كوچر، بىرى قونر.

اوغوزخان، ايت براق خانغە باستورغاندىن اون يىتى يىل سونگ تقى آتلاىب بارىپ، ايت براق خان بىرلن اوروشتى، باسىپ ايت براق خاننى اولتوروب، يورتنى آلىپ، مسلمان بولغان لريغە تيگمە ى قويوب، تنگري غە ايمان كىلتورمە غان لرينى اولتوروب، اوغلان لرينى اسير قىلىپ، قىتىپ ايوغە توشتى.

اوغوز خان نىنگ توران و هندوستانغە يورگانى نىنگ ذكرى

اوغوزخان تمام مغول وتاتار ايلي نىنگ لشكرىنى جمع قىلىپ «تلاس» و «سىرم» غە كىلدى. تاشكنت و بخارا پادشاه لرى صف تارتىپ اوروشە بىلمە دىلر. اولوغ شهرلر غە و محكم قلعه لر غە بىركىندىلر. اوغوز خان سىرم و تاشكندنى اوزى قىب آلدى و توركستان و اندىجانغە اوغلان لرينى بىباردى. آلتى آيدە توركستان بىرلن اندىجاننى آلىپ آتە سى خدمتيغە كىلدىلار. اوغوز خان بو آيتىلغان ولايت لرنىنگ برچە سىغە داروغە لر قويوب، سمرقند سىرى يوردى، تقى سمرقندنى آلىپ، داروغە قويوب، بلخ باردى. بلخ نى هم آلىپ داروغە قويوب، غور ولايتى نىنگ اوستىغە يوردى. قىش ايردى، غور نىنگ تاغ لريغە قار كوپ توشىپ ايردى، لشكر خلقى يورمككە قىلدىلار. خان حكم قىلدى كىم هيچ كىم مندىن قالمە سىن تىب، بارىپ غورنى آلدى، ايرسە يىل كىلىپ ياز بولدى، لشكر نىنگ ساتىن آلدى، بىر نيچە كىشى كم كىلدى، انلرنى سوردى، هيچكىم بىلمە دىلر. بىر نيچە كون دىن سونگ اول كىشىلر خان خدمتيغە كىلدىلار. خان انلر نىنگ احوالين سوردى، ايرسە آيتدىلر كىم بىر نيچە كىشى لشكر نىنگ سونگىندىن كىلە تورور ب ايردوق، تاغ اچىينده بىر كىچە قار ياغدى. اندىن سونگ يوروبىلمە ى، اوشول بىردە يانتوق، آت لرىمىز برچە سى اولدى. بهار بولغاندىن سونگ پىاده كىلە تورورمىز، تىدىلر. خان حكم قىلدى، اول جماعتغە «قارلوق» دىسونلر، تىب، برچە قارلوق ايل انلرنىنگ نسليندىن تورور. اندىن اوتوب كابل و غزنىن نى آلدى. اندىن سونگ كشمير اوستىغە يوردى. اول چاغده كشمير نىنگ پادشاهى نىنگ آتى «يغما» ايردى. كشمير نىنگ محكم تاغلرى، اولوغ سوو لرى كوپ بولور. يغما آنغە آرغە بىرىپ، اوغوز خانغە باقىنمە دى. بىر يىل اوروشتىلر، ايكى طرفدىن كوپ كىشىلر اولدى، عاقبت اوغوزخان كشميرنى آلدى، تقى يغمانى اولتوردى، لشكرىنى قتل عام قىلدى، بىر نيچە وقت انده توروب، قىتىپ بدخشان اوستى بىرلن سمرقند كىلدى. اندىن مغولستانغە بارىپ ايوغە توشتى.

اوغوز خان نىنگ ايران و شام و مصر سىرى يورگە نى نىنگ ذكرى

بىر يىل يورتنىده توروب ايكىنچى يىل ايلغە جار قىلدوردى: ايران سىرى يورىپ تورور من، نيچە يىللق غملرىن بىسونلر، تىب، ايكىنچى يىل آتلىدى، تقى «تلاس» شهرىغە كىلدى. خان نىنگ لشكرى كىينده قويغان كىشى لرى بار ايردى. آريغان و آچىغان و ادشقان و تىكان نى آلىپ كىلسون تىب. اول كىشى لر لشكر سونگىنده قالغان بىر ايولىك كىشىنى خان آلدىغە آلىپ كىلدىلر، اول كىشى دىن سوره دى كىم نى اوچون كىين قالىپ ايردىنگ تىب، اول آيتدى: كونليگىم آزليغىندىن لشكر نىنگ كىيندىن كىلە تورور ايردىم، خاتونىم حاملە ايردى، توغوردى. آچلىق سببىندىن آنە سى سوتى اوغلانغە يتوشمە دى، كىلە تورور ايردىم، سونىنگ يقاسينده كوردىم كە بىر شغال بىر قارغاولنى آلدى، آغاچ بىرلن شغالىنى اوردىم، ايرسە قارغاولنى تاشلب قاچتى، آنى آلىپ، كباب قىلىپ، خاتونىمغە بىرىپ توروب ايردىم، سونگ ده قويغان كىشى لرىنگىز يولىقىپ آلىپ كىلدىلر. خان فقير غە آت و آذوق



و مال بیری، و چریکغه بارمه غیل تیب، «قال آچ» تیدی. برچه «قال آچ» ایلی شو کیشی نینگ نسلبندین تورورلر. بو وقتده «خلج» دیبتورورلر، ماوراءالنهر ده کوپ تورور. ایماق ایلینه قوشوله تورورلر. بلخ غه تعلق غور تیگن شهر ده اولتورغان قال آچ لریدین آتی محمد، لقبی بختیار بیر پهلوان بیگیت بار ایردی. هندوستان نینگ دهلی تیگن شهرینده قطب الدین آتلی بیر مسلمان پادشاه بار ایردی. محمد باریب، انغه نوکر بولدی و بیر نیچه ییل دین سونگ اولوغ بیک بولدی. هندوستان تیگن بولک بولک یورت بولور. «بهار» اتلی بیر یورت بولور، کشمیر یقینینده بولور، قطب الدین، محمدبختیارنی ایلغار باشی قیلیب انغه بیباردی. محمدبختیار بهار یورتینی آلدی، انینگ اولوغ شهری «لکمیر» ایردی، انینگ توغسان یشر پادشاهی بار ایردی. آته - آته دین اول یورت نینگ پادشاهی ایردی، باریب اول یورتی آلدی. نیچه ییل لر دین بیری بیغیشورغان خزینه سی قولیغه توشتی. لکمیر نینگ تیمور قازیق طرفینده بیر اولوغ شهر بار ایردی «لکتونی» اتلیق، باریب تقی انی آلدی و خطبه نی اوز آتیغه اوقوتوب و سکه نی اوز آتیغه سوقتوروب، لکتونی شهرینی پایتخت قیلیب اولتوردی، «قال آچ» ایلندین اون مینگ کیشی انینگ قاتیغه بیغیلدیلر. کوپ ییل لر انده توردی. لکتونی بیرلن تبت نینگ آراسی اتلیق بیر یاتیب باره تورغان بیر بولور، اما بیر بلند تاغی بولور، بیر یولی بولور، بیر اتلیق یورور، ایکی اتلیق یاناشیب یوروبیلمس.

محمد بختیار اون مینگ اتلیق و اوتوز مینگ پیاده بیرلن اوشول یول دین باریب تبت نی چاپیب کیدلی، تقی بیرنیچه کوندین سونگ وفات بولدی. برچه قال آچ خلقی بیغیلیب «شیران» تیگن نی پادشاه قیلدیلر. اول اولگندین سونگ «مردان» تیگن نی پادشاه قیلدیلر و مردان بیلام و اتقوچی بیگیت ایردی، اما عقلی هیچ یوق ایردی، بو غایت ده کیم بیر کون کورنیشده اولتورغانده بیکلرینه باقیب آیتدی: اصفهانی، فلانی سینگه بیردیم، قزمین (قزوین) نی سینگه بیردیم. شونداق تیب خراسان و عراق و روم نینگ انچه بیله تورغان شهرلری نینگ بیر بیر آتترین توتوب نوکرلرینه اولشتوردی، تینگریم بیرسه سیزلرگه بیره بین تیمه دی، مونداق تیسسه تیشک بولمس ایردی. بیر کون بیر کیشی کیلیب آیتدی که سوداگر من، بو کیچه فلانچه مینگ تنگم نی اوغری آلیب تورور، تیدی. انغه آیتدی: تنگه اوچون سینگه اصفهان نینگ داروغه لیقین بیردیم تیدی. تقی دیوان غه بییتیب، مهر قیلیب قولیغه بیردی. سوداگر قورقغانیدین سوز آیته بیلمه ی، یارلیقنی آلیب باشیغه سنجدی. کورنیشده اولتورغان خلق هم قورقینچدین نیمرسه آیته بیلمه دیلر. بیر عاقل کیشی بار ایردی، اول ایتدی: پادشاهیم، مونغه اصفهان نینگ داروغه لیقین بیردینگیز. بو کیشی اگر موندین اصفهان غه یالغوز بارسه، سیزنینگ آتینگیز یامان بولور. بو کیشیغه اولچاقلی نیمرسه برینگیز کیم قوشلی و نوکرلی بولوب بارغای، تیدی. اول بدبخت نینگ کونگیلغه بو سوز یخشی کیلیب، یوز تنگه انعام قیلدی و تقی بیر یامانلیغی بو کیم قال آچ خلقی نینگ یخشی کیشی لرینی بیگناه اولتوره باشله دی. ایل یخشی لری بیغیلیب، کنگاش قیلیب مردان نی اولتوروب، «عوض» تیگن نی لکتونی تختینده اولتورتدیلر. اول هم اون ییتی ییل دین سونگ اولدی. اندین سونگ اول یورت قال آچ لر نینگ قولیدین چیقادی. اوزگه کیشیلرگه توشدی. اندین سونگ قال آچلر نوکر بولدیلر. قال آچلر نینگ پادشاهلیقی اولیدین آخیریغه چه ایلیک تورت ییل بولدی. ایندی قال آچلر غه بولوب آیته تورغان سوزیمنی قویغه لی، مونچاقلیق آیتدوق یتر.

اوغوز خان تلاس دین اوتوب سمرقند و بخاراغه کیلیب آمو سوویدین اوتوب، خراسانغه باردی. اول چاغده ایران یورتینده یخشی پادشاه یوق ایردی. کیومرث اولوب ایردی. هوشنگ نی هنوز پادشاه کوثرمه ی ایردیلر. انداق وقتنی عرب «ملوک الطوائف» دیر، معنسی بو کیم هر بیر توب ایلهه بیر توره تیمک بولور. ترک لر انداق وقتنی «ایو باشیغه قراخان» دیرلر. معنسی هر ایو ده قرا کیشی بیر خان بولوب تورور، هر بیر خان تیمک بولور. اول وقتده ایران یورتی شونداق ایردی، خراسانی آلدی، اندین اوتوب عراق عجم و عراق عرب و آذربایجان و ارمن و شام و مصر غه چه آلدی. بو آیتیلغان ولایت لر نینگ بیر نیچه سینی اوروشوب و بیر نیچه سینی باقیدیریپ اوزیگه تعلق قیلدی. اوغوز خان شام ولایتینده تورغانده پنهانی بیر نوکری نینگ قولینه بیر آلتون یای و اوچ اوقنی بیردی. تقی آیتدی: یایی کون توغوشینده بیر چولده، کیشی ایاغی یتمس بیر توپراققه کوموب بیر اوچینی چیقریپ قویغیل و اوقلرنی کون باتیشی طرفیغه ایلتیب، یای نی نیچوک قویسنگ، انی شونداق قویغیل، تیدی. اول کیشی یارلیققه عمل قیلیب کیدلی. بو واقعه دین بیر ییل اوتگندین سونگ اوچ اولوغ اوغلی کون و آی و یولدوزنی چارلب آیتدی: یات یورتگه کیلیب من، ایشیم کوپ آو اولماقغه قولیم بییتیشمه ی تورور. کون توغیشی طرفینده فلان چول نینگ آوی کوپ ایرمیش، تیب ایشیدیم، اوز نوکرنگیز بیرلن باریب انده باریب اوت و سوو قره ب، کیلینگلر، تیدی. اندین سونگ اوچ کیچیک اوغلی (کون، تاغ و تینگیز) بو اوچیسینی چارلب آقارینه آیتقان سوزنی آیتیب کون باتیشی طرفیغه بیباردی. بیر نیچه کوندین سونگ اوچ اولوغ اوغلانلری بیر آلتون یای بیرلن کوپ آونی خان آدیغه کیلتوردیلر. اول آو نینگ ایت لرینه کوپ ایتلر و تورلوک آشلرنی قوشوب



خلقنی چقیریب یای نینگ و اوق نینگ تاپیلغانینی ایریم قیلیب اوزلریغه قایته بیردی. اوچ اولوغ اوغلی یایینی سیندیریب آلیشدیلر. اوچ کیچیک اوغلی هر قیسی بیر اوقنی آلدیلر. آغان ولایت لرده کوپ بیل لر توروب، دشمنلرنی یوق قیلیب، دوستلارینی سیلب، باشی سیرم و ایاغی مصرغه چه آغان ولایت لری نینگ برچه سینه حاکم قویوب، قایتیب اوز یورتیغه توشدی.

اوغوز خان نینگ یورتینه کیلیب توی قیلغانی نینگ ذکرى

اوغلان لریم خلقیم بیرلن ایسن - امان باریب کیلیم، تیب، اولوغ توی یاراغین قیلیب، بیر خرگاه یستوردی. برچه آغاچلری نینگ باشیغه آلتون قاپله دی. لعل، یاقوت و زمرد و فیروزه و در بیلن مرصع قیلدوردی. بو بیت نی اول ابو نینگ وصفینده آیتیب تورورلر، بیت:

یر اوی تیکتی آلتون دین اول شهریار کیم اول ابو فلک اویودین قیلدی عار
توقوز مینگ قوی و توقوز یوز بیللی اولتورتدی. بولغاریدین توقسان توقوز حوض قیلدوردی. توقیز یغه عرق و توقسان یغه قیمیز تولتورتدی. برچه نوکرلرینی چقیرتیریب کیلتورتدی، اول آلتی اوغلیغه کوپ نصیحت لر آیتیب و بیکلرگه اورگه تیب یورتلر و شهرلر و ایل لر انعام بیردی. بو بیت انینگ وصفینده آیتیب تورور، شعر:

اوغوز فیلدی اول تویده جیرغامیشی بو آلتی اوغولنی سیور غامیشی
بو لر کورساتیب ایردی مردانه لیق آته بیرلن کوپ تورلی فرزانه لیق
آته غه انلر بس قیلدیلر یارلیق اروش کون لرینده برچه سی بارلیق

اندین سونگ برچه نوکرلری نینگ آتقان - چاپقان و قیلغان خدمت لریغه لایق شهرلر و سرحدلر و کیندلر و انعام لر بیردی. تقی اوغلانلریغه آیتدی: سیز اوچ لوغینگیز التون یای نی تاپیب کیلتوردینگیز، تقی انی بوزوب اولشتینگیز، سیزلر نینگ آتینگیز «بوزاوق» بولسون، سیزلردین بولغان اوغلانلرنی هم تا قیامتغه چه بوزوق تیسونلر، اوچ اوق کیتورغان اوچ کیچیک اوغلینی و اندین بولغانلرنی بو کوندین باشلب تا دنیا آخر بولغونچه «اوچ اوق» دیسونلر. یای و اوقنی که تاپیب کیلتوردینگیزلر، اول کیشی دین بولمه دی و تنگریدین بولدی. بیزدین بورون اوتگن خلقلر یای نی پادشاه اورنینه بلیب تورورلر، اوقنی ایلچی بیرینده، انینگ اوچون کیم یای اوقنی قیسی طرفغه تارتیب بیبرسه، اوق انغه بارور. ایمدی من اولگاندین سونگ کون خان مینگ تختیمده اولتورسون. اندین سونگ بوزوق نسلیندین هرکیم قابل بولسه خلق انی پادشاه قیلسونلر. دنیا آخر بولغونچه بوزوق نینگ بیر یخشی سی پادشاه بولسون، اوزگه لری اونگده اولتورسونلر. اوچ اوقلر سول بولسونلر، ابو نینگ سول طرفینده اولتورسونلر و دنیا آخر بولغونچه نوکرلیکغه راضی بولسونلر، تیب آیتدی و یوز تقی اون آلتی بیل پادشاهلیق قیلیب حق رحمتیغه باردی.

اوغوز خان نینگ اولوغ کون خان نینگ پادشاهلیقی نینگ ذکرى

اوغوز خان نینگ «اویغور» تیب آت قویغان جماعت نینگ اولوغی و آق سقالی نینگ اوغلی بار ایردی، ارقیل خواجه اتلیق. اوغوز خان آته سی تختینده اولتوروب تا اولگونچه وزیر وکیل اول ایردی. عاقل، دانشلی و کوپ بیلگن کیشی ایردی. و کون خان تقی انی وزیر قیلیب تا اوزی اولگونچه انینگ سوزینه عمل قیلور ایردی. ارقیل خواجه اوزاق عمر تاپدی. کونلر ده بیر کون، خان یالغوز اولتورغانده آیتدی: آتنگ یوزده اون آلتی بیل یاز نینگ ایسیغینده سایه ده اولتورمه ی و قیش نینگ سوقینده اویوده اولتورمه ی قیلیچ اوروب کوپ یورتلرنی آچیب، سیز آلتینگیزغه قویوب کیتدی. اگر سیز آلتینگیز نینگ و سیزلر دین بولغانلر برچه نگیز نینگ آغزینگیز بیر بولسه، اوزاق بیل لر و کوپ کونلر بو یورتلر قولونگیزدین چیقمس. اگر آغزینگیز بیر بولمه سه، اولجه یورتینگیزده کیتر و مالینگیز و جانینگیز ده کیتر تیدی. کون خان آیتدی: آتمغه کینگاش بیره تورغان ایردینگیز، آتم اورنیغه ایندی آتم سیز. سیز نه ایشنی اوخشاتسینگیز، من انی قیلایین، تیدی. ایرسه ارقیل خواجه آیتدی: اوغوزخان دین کوپ یورتلر و شهرلر و ایل لر اولوک مال لر و تیریک مال لر قالیب تورور. سیز التی اوغلونگیز نینگ هر بیرینگیز دین تورت اوغول بولوب، برچه سی بیگرمه تورت پادشاه زاده بولوب سیز آلتینگیز دین باشقه و من اندین قورقه تورور من دنیا لیک اوچون آغیزلرینگیز آله بولور تیب، کون خان ارقیل خواجه نینگ سوزینی قبول قیلیب اولوغ قورولنای قیلدی، یخشی و یامان خلق نینگ برچه سی کیلگندین سونگ، اول اوغوز خاندین قالگن ولایت لر و ایل لر و اولوک مال لر نینگ و تیریک مال لر نینگ برچه سینی و آیتیلغان



اوتوز پادشاه زاده لر نینگ اولوغینه اولوغ، کیچیگینه کیچیک چه بیردی. و بیگره تور ت اوغول آدمی خاتون لردین بولغان ایردی و مونلردین اوزگه قمالردین بولغان هم اوغلانلر کوپ ایردی. انلرنینگ هم احوال لریغه لایق نیمرسه لر بیردیلر. اندین سونگ اوغوزخان قیلدورغان آلتون ایونی تیکتوردی، اونگ یاقده آلتی اق اورکه و سونگ یاقده آلتی اق اورکه تیکتوردی و سول یاقده باشینه کموش تقوق بیرکیتگن قیرق قولاچ آغاچنی تیکتوردی و تقی خان یارلیقی بیرلن بوزوق اوغلان لری نوکرلری بیرلن آلتون تقوقنی، اوچ اوغلانلری نوکر لری بیرلن آلتون تقوقنی آت بیرلن چاپیب، آتدیلر. تقوق لرنی اورغان کیشیلر غه کوپ انعام لر بیردی. کون خان آته سی نینگ قیلغانیغه عمل قلیب توقوز یوز بیللی و توقوز مینگ قوی اولتورتدی و توقوز بولغار حوضیغه عرق تولتورتدی و توقسان بولغار حوضیغه قیمیز سالتورتدی، قیرق کیچه و کوندوز عیش و عشرت قیلدیلر.

اوغوز خان نینگ اوغلان لری و نبیره لری نینگ آتلی نینگ ذکر

ایمدی انلر ایچیب اییب تورسونلر، بیز اوغوز خان نینگ ایته گیندین یاییلغان اوغلان لرنینگ آت لرینی ایته لیک. اول هم آیتیب ایردوک، انداق بولسه اوغلان لرین و نبیره لرین و برچه لرین بیر برده ایتماقنی مناسب کوردیک.

اوغوز خان نینگ اولوغ اوغلی نینگ آتی کون خان و اندین کیچیگی نینگ آتی آی خان و اندین کیچیگی نینگ آتی یولدوزخان و اندین کیچیگی نینگ آتی کوک خان و اندین کیچیگی نینگ آتی تاغ خان و اندین کیچیگی نینگ آتی تینگیزخان. و آلتی سی نینگ هر قایسی سی نینگ آدمی خاتونلریدین بولغان تور ت اوغلی بار ایردی. کون خان نینگ اولوغ اوغلی نینگ آتی قایی، ایکینچی بیات و اوچونچی الفه ایولی و تورتنچی قرا ایولی. آی خان نینگ اولوغ اوغلی نینگ آتی یازیر، ایکینچی یاسر و اوچونچی دودورغه و تورتنچی دوکر. یولدوز خان نینگ اولوغ اوغلی نینگ آتی اوشار، ایکینچی قازیق، اوچونچی بیکدیلی و تورتنچی قارقین. کوک خان نینگ اولوغ اوغلی نینگ آتی بایندر، ایکینچی بچنه، اوچونچی چاولدور و تورتنچی چینی. تاغ خان نینگ اولوغ اوغلی نینگ آتی سالور، و ایکینچی ایمیر، اوچونچی آله یونتلی و تورتنچی اورکیر. تینگیز خان نینگ اولوغ اوغلی نینگ آتی ایگدر، ایکینچی بوگدزو اوچونچی آوا، و تورتنچی قفق.

اوغوزخان نینگ بو آلتی اوغلی نینگ قما دین بولغان اوغلان لری نینگ آت لرین ایته لینگ، اما قیسی اوغلیندین بولغانی معلوم ایمس: کنه کونه، تورپاتلی، کرایلی، سلطانلی، اوقلی، کوکلی، سوچلی، خراسانلی، یورتچی، جامچی، تورومچی، قومی، سورقی، بو وقت انی سورخی دییتورلر، قورچیق، سوراجیق، قراجیق، قازغورت، قیرغیز، تکان، لالا، مرده شوی، سایر.

ایمدی بیر نیچه ایل لر کیم اوغوزخان انلر غه آت قویوب ایردی و اوغوزخان نسلیندین ایرمسلر، انداق هم بولسه شول توی ده بار ایردی. اول سبب دین آت لرینی نامه ده بیت تورور. آت لری بو تورور کیم : قانقلی، قیچاق، قارلیق و قال آچ.

کون خان نینگ اینیلری و اوغلان لریغه اورون بیرگنی نینگ ذکر

ایمدی اون ایکی اورکه ده اولتوروب اولوش آغان و اول اولوشنی توغراغان کیم، تشقری ده آت لرین توتوب اولتورغان کیم، انلرنی بیان قیله لینگ. آلتون اورکه نینگ تورینده کون خان اولتوردی. برچه ایل یخشی لری اتفاق قلیب قوی نینگ باشین و آرقه سین، قویروقلی اوجاسین و بغرین اوجا نینگ اوستینده قویوب کون خان نینگ آلدینده قویدیلر و هر کیم خان بولسه اولوش لری بو بولسون تیدیلر. اورکه نینگ ایچکی ایشیگینده ارقیل خواجه اولتوردی، توش نی انینگ آلدینده قویدیلر، تقی هر کیم وزیر بولسه، انینگ اولوشی بو بولسون تیدیلر. ساغ قولده اولکی اورکه ده کوک خان نینگ اولوغ اوغلی قایی نی اولتورتدیلر، ساغ آشیقلی ایلیکنی اولوش بیردیلر، بیات انی توغره دی، سورقی آت لرین توتدی، بو وقته انی سورخی دییتورلر. ایکینچی اورکه ده الفه ایولی نی اولتورتدیلر، ساغ قرا ایلیکنی اولوش بیردیلر، قرا ایولی انی توغره دی، لالا آت لرین توتدی. اوچونچی اورکه ده آی خان نینگ اولوغ اوغلی یازیرنی اولتورتدیلر، ساغ یانباش نی اولوش بیردیلر، یاسر انی توغره دی، قومی آت لرین توتدی. تورتنچی اورکه ده دودورغه نی اولتورتدیلر، ساغ اومچا نی اولوش بیردیلر، دوکر انی توغره دی، مرده شوی آت لرین توتدی. بیشینچی اورکه ده یولدوز خان نینگ اولوغ اوغلی اوشارنی



اولتورتدیلر، ساغ اولوقنی اولوش بیردیلر، قزیق انی توغره دی، تورومچی آت لرین توتدی. آلتینچی اورکه ده بیکدیلی نی اولتورتدیلر، ساغ بقرین نی اولوش بیردیلر، قرقین انی توغره دی، قراجیق آتترین توتدی. سول یانداغی اولکی اورکه ده کوک خان نینگ اولوغ اوغلی بایندر نی اولتورتدیلر، سول اولوقنی اولوش بیردیلر، بچنه انی توغره دی و قاز غورت آتترین توتدی. ایکینچی اورکه ده چاولدر نی اولتورتدیلر، سول یانباشنی اولوش بیردیلر، چینی انی توغره دی و قانقلی آتترین توتدی. اوچونچی اورکه ده تاغ خان نینگ اولوغ اوغلی سالورنی اولتورتدیلر، سول آشیقلی یلیکنی اولوش بیردیلر، ایمیر انی توغره دی، قال آچ آت لرین توتدی. تورونچی اورکه ده آله یونتلی نی اولتورتدیلر، سول اومچانی اولوش بیردیلر، اورکیر انی توغره دی، تکان آت لرین توتدی. یشینچی اورکه ده تینگیزخان نینگ اولوغ اوغلی ایگدر نی اولتورتدیلر، سول قاری بیلیکنی اولوش بیردیلر، بوگدر انی توغره دی، قارلیق آت لرین توتدی. آلتینچی اورکه ده اوانی اولتورتدیلر، سول بقرین نی اولوش بیردیلر، قنیق انی توغره دی، قیچاق آت لرین توتدی.

اون ایکی یوزلوک و ییگرمه تور ت آیماق نینگ معنسی نینگ ذکر

ای تینگله غوچیلر، قارریلر و ای انگله غوچی ییگیت لر! کونگلینگیزنی بو سوز طرفیغه بیک توتونگ و قولاقینگیزنی قوی سالینگ، تقی بو سوزگه توشونینگ، ترکمن لر نینگ بورونگی اوتگن یخشی لری و عمرینی معرکه ده اوتکزگن یخشی لری انداق آیتیب تورورلر کیم اوغوز خان نینگ آلتی اوغلی نینگ اصل خاتون لریدین توققن نبیره لری ییگرمه تور ت کیشی ایردیلر. کون خان انلر نینگ هر ایکی سینی بیر اورکه ده اولتورتدی، اون ایکی بولک بولدیلر، و اون ایکی سیندین توققن لرغه «یوزلیک» تیدیلر. انینگ اوچون کیم هر نیمرسه نینگ یوزی آرقه سیندین، یخشی بولور. ایل نینگ و خلق نینگ یوز لر یغه توققان یوزلیکلری تورور تیمک بولور و تقی اول کیم اوغوز خان نینگ بیرنیچه آت قویغان کیشی لری و قومادین توققن نبیره لری، مونلر هم ییگرمه تور ت کیشی ایردیلر، برچه سی نینگ آتلی نی یوقارده بیر بیر آیتیب تورورمیز، بو لر نینگ برچه سی اوپو نینگ تشقری سینده اولتورتدیلر، اون ایکی سی آت توتوب اولتوردی و اون ایکی سی ایشیکده اولتوردی. بو ییگرمه تور ت دین توققن لرغه «ایماق» تیدیلر، اصلی اوماق تورور. رسم تورور کیم قره اولوس نینگ برچه سی سوزنی بوتون آیه بیلیمس، یارینی آیتورلر. اوشبو چاقده هم بیر کیشی بیر کیشیدین سورسه، ایلینگ نینگ اوماقی نی تورور تیب سورر. اوماق مغول تیلی تورور، بو وقتده قلماق هم اوماق دیبتورور. اوماق نینگ معنی سی اوروغ تیمک بولور، ترکمن لر نینگ اون ایکی یوزلیک و ییگرمه تور ت اوماق تیگن لری نینگ معنی سی بو ت

اوغوزخان نبیره لری نینگ

آت لری نینگ معنی سی و تامغه لری و قوش لری نینگ ذکر

ترکمن نینگ تاریخ بیلر تورغان بیلیکلی قارری لری نینگ بیر لری اوغوز خان نینگ اون ایکی اورکه ده اولتورغان ییگرمه تور ت نبیره لری نینگ آت لری نینگ معنی لرینی و تمغه لری نینگ نیچوک ایرکه نینی و قوشلری و تورغان قوشلری نینگ آت لرینی مونداغ آیتیب تورورلر کیم قایی نینگ معنی سی محکم تیمک بولور، تمغه سی نینگ صورتی بو تورور ()، قوشی - شونقار؛ «بیات» نینگ معنی سی دولتلی تیمک بولور، تمغه سی نینگ صورتی بو تورور ()، قوشی - اوکی؛ القه اوپولی نینگ معنسی موافق تیمک بولور، تمغه سی نینگ صورتی بو تورور ()، قوشی - کوپکنگ؛ قرا اولوک نینگ معنی سی هر قیده اولتورسه خرگاه بیلن اولتورغوچی تیمک بولور، تمغه سی نینگ صورتی قمچی تیک ()، قوشی - کوپک ساری، یازیر نینگ معنی سی ایل لر آقاسی تیمک بولور، تمغه سی نینگ صورتی بو تورور ()، قوشی توره م تایی؛ یاسر نینگ معنی سی آلدیغه هر نیمرسه اوچره سه بیقر تیمک بولور، تمغه سی نینگ صورتی بو تورور ()، قوشی قرغو؛ دودورغه نینگ معنی سی یورت آماقانی و انی ساقله ماقانی بیلگیچی تیمک بولور، تمغه سی نینگ صورتی و تورور ()، قوشی قیزیل قرچغه ی؛ دوکر نینگ معنی سی توکره ک تیمک بولور، تمغه سی نینگ صورتی بو تورور ()، قوشی - کوچگن؛ اوشار نینگ معنی سی ایشنی بیلدام ایشله گیچی تیمک بولور، تمغه سی نینگ صورتی بو تورور ()، قوشی - جره لاجین؛ قیزیق نینگ معنی سی بوکه تیمک بولور، تمغه سی نینگ صورتی بو تورور ()، قوشی - ساریجه؛ بیکدیلی نینگ معنی سی سوزی حرمتلی تیمک بولور، تمغه سی نینگ صورتی بو تورور ()، قوشی - بهری؛ قرقین نینگ معنی



سی آشلی تیمک بولور، تمغه سی نینگ صورتی بو تورور ()، قوشی - سو بورگیتی؛ بایندر نینگ معنی سی نعمتلی تیمک بولور، تمغه سی نینگ صورتی بو تورور ()، قوشی - لاجین؛ بچنه نینگ معنی سی قیلغوچی تیمک بولور، تمغه سی نینگ صورتی بو تورور ()، قوشی - آله توغناق؛ چاولدر نینگ معنی سی ناموسلی تیمک بولور، تمغه سی نینگ صورتی بو تورور ()، قوشی - همای؛ سالور نینگ معنی سی قیلچلی تیمک بولور، تمغه سی نینگ صورتی بو تورور ()، قوشی - بورگیت؛ ایمیر نینگ معنی سی ایلر نینگ بایی تیمک بولور، تمغه سی نینگ صورتی بو تورور ()، قوشی - انجاری؛ آله یونتلی نینگ معنی سی آله آتلی تیمک بولور، تمغه سی نینگ صورتی بو تورور، بیشیک تیک ()، قوشی - بغیل بای؛ اورگیر نینگ معنی سی یخشی ایش قیلغوچی تیمک بولور، تمغه سی نینگ صورتی بو تورور ()، قوشی - بیقو؛ ایگدر نینگ معنی سی اولوغ تیمک بولور، تمغه سی نینگ صورتی بو تورور ()، قوشی - قرچغه ی؛ بوکدر نینگ معنی سی خدمتکار تیمک بولور، تمغه سی نینگ صورتی بو تورور ()، قوشی - ایت آغور؛ اوا نینگ معنی سی مرتبه سی لند تیمک بولور، تمغه سی نینگ صورتی بو تورور ()، قوشی - توغون؛ قنق نینگ معنی سی عزیز تیمک بولور، تمغه سی نینگ صورتی بو تورور ()، قوشی - جره قرچغه ی؛ چینی نینگ معنی سی بهادر تیمک بولور، تمغه سی نینگ صورتی بو تورور ()، قوشی - بوغاینیق.

اوغوز ایلی نینگ عهد قیلغان لری نینگ ذکر

خان باشلیق برچه خلق آیتدیلر: بیر توار یا اون یا یوز ویا هر نیچاقلیق نی اولتورسنگیز اوماچه سینی اوشبو آیتیلغان تیک اوله شیب آلیشسونلر. تقی هر قیسی سی اوزی نینگ اوغلان لری بیرلن و نوکرلری بیرلن بیسونلر و تقی آیتدیلر کیم بیر کیشی گناهکار بولسه، اولکیشی پادشاه اولتورغان بیرگه یاووق بولسه و یا بیراق بولسه و یا اوزگه اوروغدین بولسه، خان نینگ بیر کیشی سی باریب انی یارغو قیلسه، انغه خان نینگ اینیسی و اوغلی و بیکلری هیچ کیمرسه قول یاپمه سونلر و منی تیپ کیلیب تورور تیپ، پشت و پناه بولوب، اگر هر کیم آرقه بولسه لر، اول آرقه بولغان کیشی نی پادشاه ایشیکینه کیلتوروب آرقه سینه قیلچ بیرلن چاپیب ایکی بولک قیلماق کیره ک تا کورگنغه کوز و ایشیکنگه قولاق بولغه ی و تقی اول کیم اوغوز نسلین دین و بوزوق اوغلانلریندین بیر کیشینی پادشاه قیلغه یلر، ایکی کیشی نی کوترمگه یلر. انینگ اوچون خان بیر بولسه ایل توزه لور و ایکی بولسه، ایل بوزولور. بورونقی اوتگن بیکلر آیتیب تورورلر کیم بیر قینغه ایکی قیلچ سیغمس و بیر خاتوننی ایکی ایر آلیب اولتوره بیلمس و بیر یورتغه ایکی توره سیغمس. بیر اولوغ کاغذ غه عهدنامه بیتیب، کون خان باشلیق اینی لری و اوغول لری و بیکلری و ایل نینگ قاری لری نینگ بخشی لری و یگیت لری نینگ بخشی لری برچه لری خط ده آتترین بیتیب، آنت ایچدیلر کیم تا تیریکمیز اوشبو آیتیلغان سوزلردین قایتمس میز. اگر بیزدین بولغان اوغلانلرحال زاده بولسه لر تا دنیا آخر بولغونچه بو عهدنامه نی اوقوب عمل قیلغایلر؛ اگر حرامزاده بولوب، یورتتی بوزه یلی تیبسه لر، عمل قیلمه غایلر تیدیلر. تقی آتترین بیتیب، مهر لرینی باسیب، عهدنامه نی گون خان نینگ خزینه سیده قویدیلر. اوغوز خان اولگنده، گون خان یتیمیش یشیر ایردی و تقی یتیمیش بیل آته سی بیرینده اولتوروب، دادو عدل بیرلن خانلیق قیلدی و تقی اندین سونگ حق رحمئیغه کیتدی.

گون خان نینگ اولوغ اوغلی نینگ خان بولغانی نینگ ذکر

گون خان اولگندین سونگ رچه اوغوز خان نینگ نیره لری و ایل بخشی لری بیغیلی قایی نی خان کوتردیلر. اول تقی آته سی تیک ایلگه عدالت قیلیب، بیگرمه اوچ بیل پادشاهلیق قیلدی و حق رحمئیغه کیتدی.

دیب یاقوی نینگ خان بولغانی نینگ ذکر

قایی خان نینگ اوغلان لری کوپ ایردی، بیر اوغلینه اولوغ آته لری «دیب یاقوی» نینگ آتین قویوب ایردی، اولوغ - کیچیک برچه اتفاق بیرلن دیب یاقوی نی خان کوتردیلر. کون لرده بیر کون دیب یاقوی خان خلق دین سوره دی کیم بو وقتده اوغوزخاننی کورگن کیشی دین کیشی بارمو تیپ، آیتدیلر: بیر کیشی قالیب تورور، سالور ایلیندین «اولاش» آتلی تیدیلر. خان کیشی بیباردی، اولاش نی کیلتوروب اوغوز خان نینگ یورتده نی



ایش قیله تورغانین و دوست لرغه نیچوک مروت قیلیب و دشمن لرغه نی طور مدارا قیله تورغانین بیر بیر سوردی. «اولاش» هم بیلگنلرینی آیتدی. اندین سونگ اولاشغه کوپ انعاملر بیریب، ایوگه بیباردی و تقی دیب یاقوی خان نینگ اولوغ بیکلری یازیر ایلیندین الان و ارلان، دوکر ایلیندین چکس و باشی بیک و بیغو بیک و بایندر ایلیندین قیل خواجه ایردیله. خان بیر کون او اولب یوریب تورغانده آندین بیقیلیب، یانباش سونگاکسی سبندی، تقی اندین اولدی. قوزی یایو اتلی اوغلی بار ایردی، انی پادشاه کوتردیلر، اوتیز ییل پادشاهلیق قیلیب اول دنیاغه کیتدی. اما اول قوزی یایو خان بولغانده انی کینگاش بیکلری ایمیر ایلیندین کرونجک ایردی، سالور ایلیندین تباق ایردی و تقی سالور دین انکش نینگ اوغلی اوتگن و انینگ اوغلی قول ساری اوچ آرقه وزیر بولدیله. یوز بیگرمه ییل پادشاهلیق قیلدی و تقی اولدی.

اوغوز ایلی نینگ یورتلری و انده نیچه ییل و نی روش بیرلن اولتورغانلری و ترکمن تیب نیچوک آت قویولغانی نینگ ذکر

اوغوزخانندین تا قوزی یایو خانغه چه نیچوک که آیتتوق شونداق تورور، ایمدی اینال خاننی آیتورمیز، تتگریم بوپورسه انشاءالله تعالی. اینال خان نینگ تا بیز بو کتابنی آیتغان چاققه چه بیربیر آیتورمیز، برچه سی راست تورور، هیچ غلطی یوق تورور. اما قوزی یایو خان بیرلن اینال خان نینگ آره سینده نیچه ییل اوتگه نینی جزم آیه بیلمه یمیز. انداق هم بولسه آیه لی شاید کوپ آیتساق یالغان بولغای. تورت مینگ ییل بار تورور. اندین بیلله تورورمیز کیم اوغوزخان کیومرث زمانینده ایردی. اینال یایو خان نینگ وزیر - وکیل قایی خلقیندین «قورقوت آته» ایردی. اول بیز نینگ پیغمر یمیز آته لری نینگ اینیسی عباس اولادی نینگ اوغلانلری بغداد شهرینده بیش یوز ییل پادشاهلیق قیلدیله. قورقوت انلرنینگ زمانینده ایردی. کیومرث بیرلن عباس اوغلانلری نینگ آره سی بیش مینگ ییل تورور. قوزی یایو خان اوغوز نینگ بیشینچی اوغلی تورور. پس اوزینگیز حساب قیلینگ، قوزی یایو خان بیرلن قورقوت آته نینگ خاننی اینال نینگ آره سی نیچه ییل بولور؟ ایمدی بیز بو آیتیلغان تورت مینگ ییل ده بیر بیر و آت به آت کیم نینگ بولغانین و کیم نینگ بولمه غانین بیلمه یتوروبمیز، مونچه - مونچه بیلسک هم باشدین ایاققه چه صورتینی بیلله تورورمیز، انی آیه لینگ.

اوغوز ایلی نینگ یورت لری نینگ کون توغیشی - ایسیغ کول و آلمه لیک و قبله سی - سیره م و قازغورت تاغی و قره چیق تاغی و تیمورقازیغی - اولوغ تاغ و کیچیک تاغ که مس نینگ کانی بولور و کون باتیشی - سیر سووی نینگ اییغی، ینگی کیند و قراقوم. اوشبو آیتیلغان بیرلر نینگ ایچینده اورنیده تورت مینگ و بیش مینگ ییل اولتوردیلر، تقی قیسی اروغی کوپ بولسه اندین پادشاه کوتردیلر. مونداغ قایی دین بیر کیشی نی پادشاه کوتارور ایردی، قایی اوروغی و بیات اوروغی و تقی بیش - آلتی آره اروغلر انغه قوشولورلر ایردی و تقی سالور دین بیر کیشی نی پادشاه کوتارورلر ایردی، سالور اوروغی و ایمیر اروغی و تقی بیر نیچه آره اروغلر انغه قوشولور ایردی. موندین قیاس قیلینگ، کوپ اوروغدین پادشاه کوتریب، آره اروغلر انغه قوشولوب گاه آلتی - بیٹی توب بولور ایردی، گاه اوچ - تورت توب بولور ایردی. و تقی بیریری بیریری اینال یایو بولوب چاپیشورلر ایردی، اسیر قیلورلر ایردی. اوزلریندین آرتقان اسیرلرنی ماورالنهر بازارگانلریغه ساتورلر ایردی. اول وقتده عراق، خراسان و ماورالنهرنینگ پادشاه لری و سپاهیلری و رعیت لری برچه «تات» ایردی. تات دین اوزگه کیشی یوق ایردی. سلطان محمود غزنوی نینگ آته سی سبکتگین قایی خلقیندین ایردی، اوزینی ترکمنلر اسیر قیلیب سوداگرغه ساتدیله و تقی بچنه اروغی هم اوزیندین توره کوتریب سالور ایلی بیرلن یایو بولوب چاپیش ایردی. بیش - آلتی آرقه غه چه بو ایکی ایل نینگ آره سینده دشمنچیلیق بار ایردی. بچنه ایلی سالور ایلینه غالب کیلور ایردی، انینگ اوچون سالور ایلی بچنه ایلینی «ایت بچنه» دیرلر. بچنه ایلی نینگ «تویمادوق» آتلی بیر پادشاهی بار ایردی، اول قوشون بیرلن کیلیب سالور ایلی نی چاپیب سالور قازان آلپ نینگ آته سی «جیجاقلی» نی اولجه لب، آلیب کیتدی. اوچ ییلدین سونگ کدخداسی «انکش» کوپ مال بیرلن بیباریب جیجاقلی نی قایته آلدی. بو سوزلر دین غرض اول کیم چاپقان لری یورتلرینده اولتوروب، چاپیلغان ایل نینگ یایو دین قوتولغانلری ماورالنهرغه قاجیب بارورلر ایردی و شونداق قیلیب باره - باره ترکمن نینگ کوپی ولایتغه توشدی، آزی قالدی. اول وقتده ترکمن نینگ نری طرفینده اولتورغان ایل لر کوپ ایردی، انینگ قیسی بیرین آیه بین. برچه ایل لر دین ترکمن غه یقینراق اولتورغان ختای و قانیقلی و نایمان ایردیله. اول ایل لر ترکمن نینگ قالغانین چاپه باشله دیله. ایسیغ کول و آلمه لیک و سیره م و اولوغ تاغلر و کیچیک تاغلر، بو یورت لر نینگ برچه سین تاشلب سیر سووی نینگ ایاقینه کیلیب، پادشاه لرین ینگی کینت ده اولتورتوب، اوز لری سیر نینگ ایکی طرفین یایلب و قیشلب اون

آرقه لری اوتغونچه اولتوردیلر و ماورالنهر غه توشگن ترکمن لرنی تاجیکلر اول «ترک» دیرلر ایردی، بیش - آلتی آرقه اوتگندین سونگ بیر غه سوو غه تارتدی، تقی چکه لری قیسق و کوز لری اولوغ و یوزلری کیچیک و بورون لری اولوغ بوله باشله دی. تورکمن یورتیغه کیلیب اولتورغان ایل لردین اسیر و سوداگر ماورالنهر غه کیله باشله دی، انلرنی کوردیلر، تقی تاجیک لر «تورک» تیدیلر بورونگی تورکلر غه «ترک مانند» تیب آت قویدیلر. انینگ معنسی ترک گه اوخشر تیمک بولور. قرا خلق ترک مانند تیب آیه بیلمه دی و تقی ترکمان تیدیلر.

اینال یاوی نینگ خان بولغانی نینگ ذکر

قایی قره خواجه نینگ اوغلی قورقوت آته سالور انکش خواجه و اوا شان خواجه باشلیق برچه اوغوز ایلی بیغیلیب، قایی خلقدین اینال یاوی نی پادشاه کوتردیلر. وزیر قورقوت آته ایردی. قورقوت آته هر نیمرسه اینسه اینال یاوی انینگ سوزیندن چقمس ایردی. قورقوت آته نینگ کرامت لری کوپ ایردی. ایکی یوز و توقسان یش بیل عمر تاپدی، اوچ پادشاهغه وزیر بولدی.

اینال یاوی یتدی بیل پادشاهلیق قیلدی، ایکی اوغلی بار ایردی. اولوغ اوغلی نینگ آتی «آل» کیچگی نینگ آتی «دویلی قایی». اینال یاوی خان اولر بولغانده دویلی قایی نی اونینده اولتورتوب کیتدی. دویلی قایی هم قورقوت آته نینگ سوزینه عمل قیلور ایردی و تقی قورقوت دین باشقه ایکی ایناق بیگی بار ایردی. بیرسی ایندر ایلیندن «بکدز» آتلی و تقی بیر ایگدیر دین «دونکه» آتلی. دویلی قایی کوپ بیل لر پادشاهلیق قیلدی. اوغلی یوق ایردی، آشین آشیب و یاشین یشب اوزاق عمر تاپیب وفات تاپدی.

دویلی قایی نینگ اینیسی ایرکی نینگ پادشاه بولغانی و اوغلی تومن نینگ دنیاغه گیلگنی نینگ ذکر

دویلی قایی نینگ بیر یقین قرینداشی بار ایردی، ایرکی آتلی، اول عزا ایگه سی بولوب اولتوردی، برچه اوغوز ایلی عزاغه کیلدیلر. قورقوت آته باشلیق برچه بیکلر سوردیلر، خان نینگ کوچ لری نینگ هیچ بوی لرینده بارمو تیب، بیر دایه خاتون کیلیب آیتدی: خان نینگ بیر حرمی حامله تورور، امیدیمیز بار تیز بولغای تیب، آیتدی. بیر نیچه کوندین سونگ خان نینگ اولوک آشین بیربی اولتوروب ایردیلر، «خان نینگ اوغلی بولدی» تیب سیوینچی تیه دیلر. ایرکی باشلیق برچه بیکلر سیوینچی بیردیلر، ایرکی خلقغه ساون سالدی، هر کیم همتیغه لایق ساون کیلتوردیلر. تورت یوز ییلقی و تورت مینگ قوی اولتوردیلر، بولغاریدین اوچ حوض تیکتوردی، بیرسینی عرق بیرلن و بیرسی نی قمیز بیرلن و بیرسی نی قتیق بیرلن تولتورتدی. بیر آی کیچه و کوندوز توی توتدی، برچه سی یخشی - یامان عیش و عشرتغه مشغول بولوب، قارری لر یاشین اونوتدی و فقیرلر مالسیزلیقینی اونوتدی و بای لر اولوسین اونوتدیلر. اوغوز ایلی قورقوت غه آیتدیلر: بو اوغلانغه یخشی بیر آت قویغیل تیدیلر، قورقوت آته مونینگ آتی تومن خان بولسون تیدی. خلق آیتدیلر: موندین یخشی راق آت قویغیل تیدیلر، قورقوت آته آیتدی: موندین یخشی آت بولمس تیدی. اول کون که دویلی قایی خان اولدی، ایرسه بیزنینگ یورتیمیزنی تومن توتوب قرانگی بولدی. و اوغول تومن ده توغدی، انینگ اوچون تومن آت قویدوق و ایکیچی کونگلودین یخشی ایریم و نیت قیلیب، انینگ اوچون تومن آت قویوب تورور من کیم تومن اوزاق تورمس تیز کیه تورغان نیمرسه بولور. تومنلی کون آفتاب بولور، تومن نینگ سونگی یاروق بولمه ی بولمس. آزغینه تورغان تومنی بو اوغلان نینگ یاشلیقینه اوخسه تیب من، سونگی آفتابنی بو اوغلان نینگ بیگی بولوب آته سی تختینده اولتوروب دولتی و اوزاق عمرلی بولغانیغه اوخشاتیب من تیدی. برچه خلق مونی ایشیتیب قورقوت غه آفرین آفرین تیب، خوشحال بولوب تومنغه کوپ دعالر قیلدیلر و تقی قورقوت باشلیق برچه خلق ایرکی غه آیتدیلر: بیر آی توی قیلدینگ، آشینگ تمام بولمه دی و حوض لرغه سالغان قیمیز و ایرانینگ کول نینگ سویندین کوپ بولدی. ایمدی بو کوندین سونگ سینی «کول ایرکی خان» تیگه لی. تومن اوزینگ نینگ اوغلینگ تورور، آغه نگ دویلی قایی نینگ اورنینه اولتوروب خانلیق قیل و هر قچان تومن بیگی بولسه، انغه نی بیرورینگنی اوزونگ یخشی بیلور سن، تیدیلر. تقی کول ایرکینی خان قیلدیلر. خلق بیرلن یخشی معاش قیلیب اولتوردیلر. تومن بیگی بولدی. دویلی قایی خان نینگ ایری کیشی لری تومن غه سوز بیردیلر، پادشاهلیق آته



دین سینگه میراث قالغان تورور. برچه خلق اتفاق بیرلن کول ایرکی غه عاریت تاپشوریب ایردیله، بو شرط بیرلن کیم هر قچان سن الوغ بولسنگ سینگه تاپشورغای تیب. تومن بو سوزنی کول ایرکی غه بیر کیش دین آیتوردی، کول ایرکی بو سوزنی ایشیتگندین سونگ خلوتده قورقوتغه آیتدی. تقی انینگ مصلحتی بیرلن ایل نینگ یخشی لرینی چارلب اولوغ توی قیلدی، قورقوتنی اوو نینگ تورینده اولتورتوب کول ایرکی خان یوکنوب قیمیزلی ایاقنی سوندی. قورقوت قیمیز ایچیپ برچه خلق اش بیگندین سونگ کول ایرکی آیتدی: ای ایل و خلق، برچه نگیز بیلورسیزلر پادشاهلیق تومن نینگ حق ایرکه نین. بو وقتغه چه تومن یاش ایردی، انینگ اوچون من ایشنی قیله تورور ایردیم، ایمدی تومن اولوغ بیگیت بولدی. آته سی نینگ تختینی تاپشوره تورور من ؛ تیدی. برچه خلق قورقوت غه آیتدیله: خان نینگ و برچه اوغوز ایلی نینگ اختیاری سینینگ قولونگده تورور، نی ایشنی مناسب کورسنگ، انی قیلغیل تیدیله. قورقوت بو سوزنی ایشیتگندین سونگ کیشی بیباریب تومن نی کیلتورتیب اوو نینگ اورته سینده اولتورتوب آیتدی: آتنگ اولدی، سن یاش قالدینگ، کول ایرکی هم اتنگ تورورو هم آقانگ، سنی دنیاغه کیلگننگ دین تا بو وقتغه چه کوپ ایمکک لر بیرلن یخشی اسره ب تورور، تاج و تخت و ایل و برچه یورت سیننگی تورور، سیندین اتونیمیز بو تورور کیم بیر نیچه کون صبر قیلغیل، آقانگ نینگ بیر کینیدین ناریلیقی یاووق بولوب تورور تیدی. ایرسه تومن آیتدی: برچه اوغوز ایلی نینگ یخشی سی آتم نینگ وزیری و منینگ بابام تورور سیز، سوزینگیزی قبول قیلدیم، تیدی. کول ایرکی نینگ بیر قیزی بار ایردی، بسیار کورکلی، آته و آته سی نینگ برچه ایشلرینه ایرکلی. قورقوت کول ایرکی بیرلن تومنغه سوزله شیب یینی کیچه و کوندوز توی قیلیب پادشاه لرغه لایق اسباب و توزوق بیرلن قیزی تومن غه تاپشوردیلر. اول وقتده اوشار ایلی نینگ خانی بار ایردی «آینه» اتلی، بو قیزی اوغلیغه آیتوب ایردی، کول ایرکی قبول قیلیب بیرماقچی بولوب ایردی. آینه خان قیزی تومن غه بیرگه نین ایشیتگندین سونگ چریک تارتیب کول ایرکی نینگ اوستیغه یوردی. کول ایرکی هم اولوغ چریک بیرلن قرشی باریب، اوروشیب آینه نی باستی. آینه نینگ اوغلونی اولتوردی و اوشار نینگ لشکرین قیردی. آینه نی قاووب یورتینه باردی، یورتینی آلیب آتی آند اولتوردی. آینه قاجیب اوزگه ایلگه باردی، کول ایرکی آنت ایچیپ آینه غه کیشی بیباری آیتدی کیم بو یامانلقنی قیلغان سن ایمس ایردینگ، اوغلونگ ایردی، ایرسه جزاسین تاپدی. ایمدی سیننگ بیرلن قرینتاش تورورمیز، کیل تقی یورتونگه ایگه بول، من قیته تورور من، تیدی. ایلچی باریب بو سوزلرنینگ برچه سین آیتدی. آینه اینانیب کیلیب کول ایرکی نی کوردی، کول ایرکی تقی یورتینی تاپشوروب قیتیپ اوز یورتیغه توشدی.

تومن نینگ اوغلی بولغانی و انغه آت قویغانلری و یگیت یتیشگندین سونگ قانلی یاولی آت قویغان لری نینگ ذکر

تومن نینگ کول ایرکی نینگ قیزی دین اوغلی بولدی، آتینی یاولی قویدیلر. توغیشلی و آلپ بولدی و بیگیت ییتیلدی. بیر کون سوو نینگ یقاسینده بیگیت لر بیلن اوینه تورور ایردی، بیر بیگیت بیرلن اوروشدی، انی اورابین تیب نیمرسه ایزله دی، یقین ده بیر توپ قیزغن دین اوزگه نیمرسه تاپمه دی. انینگ اوچیندین توتوب، توبیندین چیه ریب اول بیگیت نینگ بوینیغه اوردی، ایرسه بوین اوزولدی، تقی اولدی. کول ایرکی خان، تومن و قورقوت و برچه بیکلر اولتوروب ایردیله، یاولی نینگ بو قیلغان ایشین آیتدیله، ایرسه اولوغ و کیچیک و یخشی و یامان و کورگن و ایشینگن تانگلب حیران قالدی. تومن آیتدی: بو اوغلان نینگ آتینی بو وقتغه چه یاولی دییورتور ایردوک، ایمدی «قانلی یاولی» تیمک کیره ک تیدی. ایرسه اندین سونگ انغه قانلی یاولی تیدیله. کونلرده بیر کون کول ایرکی خان اورکه ده اولتوروب ایردی، تومن تقی آند حاضر ایردی. قانلی یاولی ایشیکدین کیریب کیلدی و اورته بیرده اولتوردی، تقی کول ایرکی غه باقیب آیتدی: ای با با بو اولتورغان تختینگ اولوغ آتم دولی قایی نینگقی تورور، بو وقتغه چه آتم تومن نی یاش تورور تیب بیرمه دینگ، ایمدی نی اوچون بیرمه ی تورور سن، تیدی. کول ایرکی خان باشینی قویی سالیب کوپ اولتوردی، تقی بیر فرصتدین سونگ باشین کوتریب آیتدی: بو سوزنی من سیندین بورونراق آیتور تیب امید قیلور ایردیم و خاصه اول کون کیم تیکن بیرلن کیشی نینگ بوینین اوزدونگ، راست ایته تورور سن، خوب بولور، یخشی بولور، ایمدی آتنگه تاپشورماق کیره ک.



تومن نینگ خان بولغانی نینگ ذکرى

كول ايركى بو سوزلرنى نبيره سيندين ايشيتگندين سونگ قورقوت باشليق برچه اوغوز ايلينه كيشى بيبارب كيلتورتوب اولوغ توى قىليب تومن نى خان كوتردى، تختينده اولتورتىب، كول ايركى اياق اوستينده توروب، تومن خانغه آيتدى: آتنگ اولوب، من بو تختده اولتوروب ايل نى سوره ي تورغالى اوتوز بيش ييل تورور. سيندين اميديم اول تورور كيم من نيچوك ايل نينگ يخشى و يامانينى سوروب، نى يول بيرلن پادشاهليق قىليب يورگن بولسم، سن هم اوشول يول بيرلن يورگه ي سن تيدى. تومن آيتدى: يخشى ايتە تورورسيز، اگر منينگ دولتيم بولسه سزىنگ بو نصيحت لر ينگيزنى قبول قىلغە ي من تيدى. يورت سوزلرى تمام بولغاندين سونگ كول ايركى خان قانلى ياوى نينگ يوزيگه باقىب آيتدى: اى قيزيم اوغلى، قيزدين بولغان نينگ دوستليغى بولمس تيب ايشتتيب ايرديم، بورونقى اوتگن لر نينگ سوزلرينى يالغان قىلمه دينگ، تيدى. تومن خان تورت آي خانليق قىلغاندين سونگ قورقوت باشليق برچه خلق تومن غە آينديلر: تنگريغه شكر قىلغىل قانلى ده ي يخشى اوغلونگ بار، مناسب اول تورور كيم پادشاهليقتى انغه بيريپ، اوزونگ عيش و عشرتغه مشغول بولغە ي سن تيديلر. ايرسه تومن هم قبول قىلدى. تقى پادشاهليق نى اوغليغه بيريپ تينچ كونگول بيرلن تنگري نينگ بنده ليگين قىليب اولتوردى.

قانلى ياولى نينگ خان بولغانى نينگ ذكرى

اول عجايب بهادر و ميرگن و آلپ ايردى، تورت طرفينده يورت لرنينگ برچه سين ياولب آليب اوزيگه باقتوردى، انينگ زمانينده بورى قويغە و برس كييگه و بورگيت قويانغە و قرچغە ي ككليك گه زور قيله بيلمس ايردى. ايللر نى توزوب و ياغى لرنى بوزوب و اوز زمانينده قى پادشاه لريدن اوزوب توقسان ييل پادشاهليق قىليب وفات تاپدى.

مور ياوى نينگ خان بولغانى نينگ ذكرى

قانلى ياولى نينگ ايكي اوغلى بار ايردى، اوليغى نينگ آتى مورياوى و كيچيگى نينگ آتى قرا آلپ ارسلان. اولر بولغانينده يورتيني ايكي بولدى. تركستان و ينگى كينت نى مور ياوى غە بيردى، تلاس بيرلن سيره منى قرا آلپ ارسلانغە بيردى. بير نيچه ييل اوتگندين سونگ قرا آلپ، مورياوى بيرلن ياغى بولدى، ايل يخشى لرى آره ده يوروب كوپ نصيحت لر قىليب يره ش توزه لى تيديلر. قرا آلپ ارسلان راضى بولمه دى. آخر ايكيسى لشكر تارتيب سيرم اوستينده اورشديلر، مور ياوى غالب كىلدى. قرا آلپ ارسلان اوروشده اولدى. برچه ايل لرينى چاپيب بير ييل انده توروب قيتيب اويو گه توشدى. قرا آلپ ارسلان نينگ بير كيچيك اوغلى بار ايردى، انى و كوچلرى نى مورياوى آليب كىلدى و موندن بير نيچه ييل لر اوتدى. بير كون مورياوى اولتوروب ايردى. قرا آلپ ارسلان نينگ اوغلى كىلدى. انينگ يوزيگه باقىب آيتدى: اگر آتنگ نادانليق قىليب منينگ بيرله ياغى بولمه سه ايردى، مونداق يتيم بولوب سرغه ييب يورمس ايردينگ. دريغا نه قىلايين تيب كوپ ييغله دى. تقى آيتدى: سنينگ آتينگ آلپ توغاچ بولسون تيدى، آته سيندين قالغان يخشى كيشى لرنى كيلتوروب آلپ توغاچ نى انغه تاپشوروب، آته سى نينگ يورتيني بيريپ كوچيريپ بيباردى، خلققه حكم قىلدى قرا آلپ ارسلان نينگ ايليندين اولجه قىليب كيلتورگن كيشى لرنى قيته ريب بيرسونلر، تيدى. آلپ توغاچ باريپ آته سى نينگ يورتينده اولتوردى، تورت ياققه كيتگن نينگ برچه سى انغه ييغىلدى. مورياوى خان يتيمش ييل پادشاهليق قىليب اول دنياغه كيتدى.

مورياوى نينگ اوغلى قرا نينگ خان بولغانى نينگ ذكرى

مورياوى نينگ خاتون لريدن اوغلى يوق ايردى، اورجه خان تيگن نينگ ايلين چاپيب آغانده بير ضعيفه نى اولجه قىليب بير نيچه كون باقىب بيباردى. اول ضعيفه ايليغه بارغاندين سونگ مورياوى خاندن حامله



بولوب تورور من تیدی. بیرنجه آیدین اوغول توغوردی، آتین قرا قویدیلر، تغایلر نینگ ایچینده اوسدی. یگیت بولغاندین سونگ قاچیب موریایوی خان قایتغه کیلدی. موریایوی هم انی اوغول قیلدی، مور یایوی اولگندین سونگ برچه خلق بیغیلیب انی خان کوتردیلر، ایل بیرلن یخشی معاش قیلیب، قیرق ییل خانلیق قیلیب وفات تاپدی.

بغرانینگ خان بولغانی نینگ ذکرى

قراخان نینگ بغرا آتلی اوغلی بار ایردی، برچه خلق قراخان اولگندین سونگ بغرانی پادشاه کوتردیلر. بغراخان برچه اوتگن آته لریندین آرتوق بولدی. اولوغ لشکر بیرلن کیلیب بخارا و سمرقندنی آلیب، اوز قرینداشلری، یورتینده یاغی بولغان سبب دین توره بیلمه ی، قیتیب کیتدی. اندین سونگ کیلیب خوارزم مملکتینی آلیب کوپ ییل لر انده پادشاهلیق قیلدی. بیر کرت آرقه طرفیغه لشکر تارتیب باراتورغان بیر کون، خان آیتدی: کونگلیمیز بوغداى اونیندین بولغان آشنی تیله ی تورور، اوکره و اوزگه اش قیلغانی اورجی و اش نینگ اسبابی تاپیلده دی. خان اون کیلتورتدی و خمیر قیلدوردی و اوزی قولی بیرلن یازیب قزانغه سالدی. اولتورغان نوکرلری هم خانغه یارولیک قیلدیلر، بیشیریپ ایچدی، تقی آیتدی بو اش نینگ آتی «بغراخان» بولسون تیدی. بو کون خلق ایچینده «بغرا» تیب بیشیره تورلر، اول اش تورور. خان نینگ ایکی اوغلی بار ایردی: اولوغی نینگ آتی بیک تگین، و کیچیسى نینگ آتی قوزی تگین، تگین معنسی قدیم تورک تیلی بیرلن یخشی صورتلی تیمک بولور. خان قاری بولغاندین سونگ پادشاهلیق نی قوزی تگین غه بیردی. تقی اوزی تینچ اولتوردی. بابر آتلی خاتونی بار ایردی، اول وفات تاپدی، ایرسه بغرا خان اولوغ عزا توتدی. بیر ییل غه چه کیشی بیرلن سوزلشمه دی و اوو دین چیمه دی. بیر کون قوزی تگین آته سیغه : قچانغه چه عزا توتوب، غمگین بولوب اولتوره سیز، آوغه چیقینگ، شاید کونگلینگیز آچیلغای، تیب، آته سینی هر بیرکون بیر طرفغه آوغه و سیرگه آلیب چیقیدی. بیر نیچه کوندین سونگ : ایمدی خان نینگ کونگلیغه هوا و هوس پیدا بولدی، بولغای تیگن وقتده ایتدی: بیکلر آیه تورورلرخان غه مناسب اولتورور کیم کدخدا بولغایلر. خان آیتدی: انداق خاتون نی بیردین تاپیلور که کیلیب آته نینگ اورننن توتغای، تیدی. قوزی تگین: آنم تیک بولمه سه اندین بیر یراک بولسون تیدی. خان هرچند کدخدا بولمان تیدی، اما قوزی تگین اختیارینه قویمه دی. اوشار ایلینده «اکرنجه» تیگن نینگ کورکه لی، یخشی یورته آت کوترگن کورکل قیزی بار ایردی، انی خانغه آلیب بیردی. اول بدبخت قیز نینگ کونگلینه بومعقول بولدی کیم قوزی تگین نینگ منغه میلی بار، انینگ اوچون منی آته سیغه بهانه بیرلن آلیب بیره تورور تا اوزی منینگ بیرلن پنهانی عیش قیلغای. یوق ایرسه قاری کیشیغه منینگ تیک صاحب جمال قیزی نی اوچون آلیب بیرور ایردی تیب، بیر کون قوزی تگین آته سین کورایین تیب کیلدی، ایرسه خان اوخلب یاتیب و خاتون اولتوروب ایردی، قوزی تگین نینگ قاتیغه کیلیب، یوزین و کوزین سیلب سیب ایردی، ایری بیرلن اوینه غانده خاتون لر نی تیک قیلورلر، شونداق قیله باشله دی. قوزی تگین کونگیندین بو آنم اورنیغه بولوب منغه مهربانلیق قیله تورغان تورور تیدی. ینه یر نیچه کوندین سونگ خلوت تاپیب قوزی تگین غه آیتدی: هیچ منینگ حالیمدین خبرینگ بارمو، من سنغه عاشق تورور من، کیچه لر اوبوقوم و کوندوزلر قراریم یوق، منینگ حالیمغه قره مس بولسنگ نی اوچون منی قاری کیشیغه آلیب بیردینگ، تیدی. قوزی تگین آیتدی: منینگ آنم تورور سن، اگر بو کوندین سونگ بو قیلاینگنی قویمه سنگ، سنی پاره پاره قیلیب هر موجانگنی بیر برده قویر من تیدی. خاتون واقعات نی اوزی نینگ فرینتاش خاتون لریغه آیتیب کینگاشتی، ایرسه انلر آیتدیلر: قوزی تگین بو سوزنی خانغه، خلغه آیتمس دین بورون آیتماق کیره ک. یوق ایرسه اولومغه کیترسن، تیب برچه سی اتفاق بیرلن بیر خاتوننی بیباردیلر. اول خاتون باریب قوزی تگین نینگ اویندین اوتیکین اوغورلب کیلیب، بغرا خان نینگ اووگه کیلیب تقی قیتیب باریب اوتیکینی بیرینده قویوب کیلدی. اول کیچه خان اوو ده یوق ایردی، آوغه باریب ایردی. تون یریمیندین سونگ آزغینه قار یاغیب ایردی، سحر وقتینده خاتون قیچقیره باشله دی. تانگ آتغاندین سونگ خلق ایشیتدیلر کیم اورکه دین بیغله غان خاتون نینگ آوازی چیقه تورور، ایر و خاتون برچه بیغیلیب اورکه نینگ ایشیکگه باردیلر، ایرسه کوردیلر کیم خانم یوزین بیرتیب، برچه بیرینی قان قیلیب آیه تورور کیم بو کیچه سحر وقتینده اوخلب یاتیب ایردیم، بیر کیشی کیلیب قویومغه کیردی، کوردیم ایرسه قوزی تگین خان، ایتدی: قیچقیرمه، من تورور من، من سنغه عاشق بولوب، آتمغه آلیب بیردیم، انینگ اوچون کیم کوندوز آتم نیگکی بولسنگ، کیچه منینگکی بولغای سن تیب، یوق ایرسه آتم خاتوننی نه قیلور ایردی، تیدی. من قیچقیره بیردیم، آته سیغه مونداق ایش نی یرده بار تیب. مندین بو سوزنی ایشیتگندین سونگ قاچیب کیتدی. یانینده یاتقان خاتونلر بو



سوزنی گواھلیق بیردیلر و تقی خانم آیتدی موندین یخشی گواه بولمس، بیر قار تورور، ایزین کورونگ تیدی. ایزنی کوردیلر، قوزی تگین نینگ اویودین چیقیب اورکه غه کیلیب تقی قیتیپ قوزی تگین نینگ اویو غه باریب تورور. قوزی تگین ایز نینگ قاتیغه کیلیب ایاغین قویدی، ایکسی بیر تیک بولدی. بغرا خان اودین کیلیدی، انغه هم آیتدیلر. خان باشلیق برچه بیکلر قوزی تگین نی چقیریب آیتدیلر: بو نی ایش تورور کیم کیچه سی قیلیب سن. قوزی تگین اول خاتوندین کورکه نین و ایشتگه نین آیتدی، تقی تیدی، من اویالغانیمدین آیته بیلمه دیم. ایکینچی اول کیم ضعیفه نی آتمغه من آلیب بیریب ایردیم، خلق ایچینده رسوا بولمه سون تیدیم. اول میندین بورون قارباندی تیدی. خلق ایکی بولک بولدیلر، بریمی خاتون سوزیغه ایناندیلر، بریمی قوزی تگین سوزیگه ایناندیلر. آخر برچه لری اتفاق قیلیب خانم یانینده یاتقان خاتونلرنی خان آلدیغه کیلتوروب سوردیلر، آیتمه دیلر. سیاست قیلور بولدیلر، ایرسه اول دین آخرغه چه قیلغان کینگاش لرین اوشار نینگ خاتون لری نینگ آیتغان سوزلرینی و اوتیکنی اوغورله غانینی بیر بیر آیتدیلر. ایرسه بغراخان قوزی تگین غه آیتدی: بو خاتوننی آلور ده اونه مه ی ایردیم، شونداق بیر فتنه بولور تیب، سن منی اختیاریمغه قویمه دینگ. امدی قیلورنگنی سن یخشی بیلور سن تیدی. ایرسه قوزی تگین بویوردی بیش ایملک بایتالنی کیلتوروب ایکی ایاغین و ایکی قولین و بونین هر قیسی سین بیر بایتال نینگ قویروغینه باغلب بایتال لر نینگ بوت لرینه نیزه نینگ اوچی بیرلن سنجدیلر، تولای تولای خاتوننی بیش پاره قیلیب هر قیسی سی بیر اندامینی اوز اورکینه آلیب کیتدی. بغراخان کوپ بیل لر پادشاهلیق قیلدی و توغسان یشب اولدی.

بغراخان نینگ اوغلی قوزی تگین نینگ خان بولغانی نینگ ذکر

قوزی تگین آته سی تختینده اولتوروب دشمنلرنی بیغله تیب و دوستلرنی کولدوروب، ایلگه عدالت قیلیب، فقیره، مسکینه خیر و احسان قیلیب، قیرق بیل خان بولوب یتیمیش بیش یاشیغه یتگنده اوغلی ارسلان نی اورنیده اولتورتوب وفات قیلدی.

قوزی تگین نینگ اوغلی ارسلان نینگ خان بولغانی نینگ ذکر

ارسلان آته سی تختینده اولتوروب، اولوغ خان بولدی. کوپ بیل لردین سونگ سوارجیق ایلی یاغی بولدی، ارسلان باریب سوارجیق ایلینی چاپیب، قالغانین اوزینه باقیندوروب کیلیدی. انده بیر یاش اوغلاننی اولجه لب کیلتوروب آتینی «سوار» قویوب قولینده اوستوردی. اول عقلی و توغیشلی و میرکن و چیچن هنرلی هر مقامغه و هر بولغه یورومک نی بيله تورغان و خانغه ایناق بیگیت بولدی. برچه ایشیک خلقی کوره بیلمس لیگیندین مونینگ بیرلن یامان بولدیلر. سوار نینگ عیبینی خانغه نیچوک آیتورلرینی بيله بیلمه ی یوروب ایردیلر. بیر کون معرکه ده خان سوار نینگ قولاقینه سوز آیته تورور ایردی، سقالی خان نینگ یوزیگه تیگدی. سوار کیتگندین سونگ، خان بیکلریغه باقیب آیتدی: سوار اسرو نی اوپوب بولوب تورور تیدی. بیکلر آیتدیلر: بیز مونینگ قیله تورغان ایشلرینی خلوت ده عرض قیلالی تیب، خلوت بولغانده آیتدیلر: فلان وقتده فلان مالینگیز غه مونداق خیانت قیلدی و فلان سرینگیزنی خللقه فاش قیلدی و یاغی دین آلیب کیلیب ایردینگیز اصلیه تارتاتورور، بیز انینگ قیلغان یامانلیق لری نینگ قیسی بیرین آیته لی، برچه ایشلریندین یامانراق بو کیم سیزنینگ کوچینگیز بیرلن بیریکیب یوریب تورور تیدیلر. ارسلان خان آیتدی: سوارنی ینگ کینت گه خدمتغه بیباردیم، کیلگندین سونگ سیزلرگه تاپشورایین، نیچوک اولتورورینگیزنی سیزلر یخشی بیلورسیزلر، تیدی. تقی آیتدی: فلان بیرده کییک کوپ ایرمیش، اوزیم بارایین تیب ایردیم، توناکوندین بیر برچه بیریم آغریتورور، سیزلر خللقه باش بولوب باریب اوتوسوقونینگ فقیر و مسکین قیش آذوقی آلسونلر، بیکلر خلقنی آلیب آوغه کیتدیلر. خان خاتونی بیرلن کینگه شیب خسته بولدی. بیر نیچه کوندین سونگ خبر بولدی، ایرسه اویو ده قالغان بیکلر، آوغه کیتگن بیکلر غه و سوار غه کیشی بیباردیلر، خان نینگ حالی یامان بولدی بیتیش کورسونلر تیب، بیکلر او دین کیلور کونی خان اولدی. کیلدیلر ایرسه کورسه لرخان اولوب تورور. برچه بیکلر کینگشیلر تقی خان نینگ اولوک و تیریک بولغان مالی نینگ برچه سینی آلدیلر. اول وقتده سوار هم کیلیدی. سوار غه آیتدیلر: خان نینگ اولوکی قچان چیه رورینی، نی یرده قویه رینی و عزانینگ برچه تکلیفینی خانم بیرلن سن بیلورسن، سن قیلغیل. انینگ اوچون تیریک لیگینده هم سیز ایکینگیز برچه ایشینی قیله تورغان ایدینگیز، امدی اولگنده هم



سبز لر قیلینگ، تیدیلر. تقی اولوک اوستینه کیلمه دیلر، تشلب کیتدیلر. سوار خان ایاقی نینگ اوچینده سقالینی کیسیب بیر تاشنی آلیب باشیغه و کوکسیغه اوروب برچه یرینی پاره پاره قیلیب آیتیب بیغله تورور ایردی: اولگه نینگده بولمه دیم و خدمتینگه یره مه دیم، ایمدی سنی بیر یرده قویماق اوچون توروب من، اندین سونگ سن سبز بو دنیا ده یورومک، منغه حرام تورور، اوزومنی اوزوم اولتورور من، تقی سنینگ ایاق اوچینگده یاتور من تیب، بیغلب اولتوروب ایردی. خان بیریندین قوپه کیلیدی، تقی سوارنی قوچاقلب یوزیندین اوپدی، تقی آیتدی: سنینگ و سندین غیبت قیله تورغان بیکلر نینگ حقیقتین بیلیمک اوچون اوزومنی اولیک قیلیب ایردیم، تیدی. خان نینگ تیریکلیگینی ایشتیپ برچه خلق کیلدیلر. خان نینگ مال لرین آلیب، اولیگی غه قره مه ی تشلب کیتگن بیکلرنی توتوب کوزلرین کور قیلیب و قول لرین کستوردی. ارسلان خان یتیمیش بیل پادشاهلیق قیلپ وفات تاپدی.

بغرا خان نینگ اولوغ اوغلی ایل تگین و انینگ اوغلی عثمان نینگ خان بولغانی نینگ ذکر

ارسلان خان نینگ اوغلی کیچیک ایردی، اولوغ اغاسی نینگ اوغلی بار ایردی عثمان آتلی، انی خان قیلدیلر، اون بیش بیل پادشاهلیق قیلیب وفات تاپدی.

ایل تگین اوغلی ایسل نینگ خان بولغانی نینگ ذکر

عثمان نینگ بیر اینیسی بار ایردی - ایسل، انی خان قیلدیلر، اول تقی اوچ بیل خان بولوب آته سی کینیدین کیتدی.

ایسل اوغلی شبان نینگ خان بولغانی نینگ ذکر

ایسل نینگ شبان آتلی اوغلی بار ایردی، انی خان قیلدیلر، اول تقی آته لری یورگن یولیدین یوروب بخشی غه یخشی و یامانغه یامان بولوب بیگرمه بیل آته سی تختینده اولتوروب، اولوغ آته لری نینگ کوچی نینگ یرینه توشوب کوچوب کیتدی.

شبان اوغلی بوران نینگ خان بولغانی نینگ ذکر

شبان نینگ اوغلی بار ایردی - بوران آتلی. انی خان قیلدیلر، بوران تقی ایل بیرلن یخشی سلوک قیلیب اوغوز ایلی نینگ رسم لرین و قاعده لرین برطرف قیلیمه ی، اون سکیز بیل پادشاهلیق قیلیب وفات تاپدی.

علی نینگ خان بولغانی نینگ ذکر

اول وقتده اوغوز ایلی سیر سووی نینگ ایکی طرفینده ایاقینه یقین اولتوروب ایردیلر، مغول کیلیب کوپ چاپتی، انغه تاب کیلتوره بیلیمه ی کوپراگی کوچوب کیتدی، اورگنچ باردیلر، قالگن لری علی تگین نی خان کوتردیلر و علی نینگ بیر یاش اوغلی بار ایردی فیلیچ ارسلان آتلیغ، انغه «شاه ملک» لقب قویوب بوکدوز ایلیندین قوزیچی بیک تیگن یوز یشر کیشی بار ایردی، اول وقتده اوغوز ایلی نینگ یورتی سیر سووی نینگ ایاقی اورگنچ بیرلن سیر سووی نینگ اره سی آمو سووی نینگ ایکی طرفینده اورگنچ بیرلن مرو نینگ اره سینداقی قوم نینگ ایچی تا مرغاب سووی نینگ ایاقیغه چه. علی خان اوزی ینگ کینت ده اولتوروب، شاه ملک نی قوزیچی غه تاپشوروب، اوغلیغه قوزیچی نینگ سوزیندین چیقمه تیدی. شاه ملک نی اوغوز ایلی ایچینه آلیب بار، انده اوسسون، و خلقغه و خلق مونغه اورگنسون، ایل نینگ بیر چتینده من اولتوروب و بیر چتینده اوغولم بیرلن سن بولغیل تیب اوزاتدی. شاه ملک ایل ایچیگه کیلیدی، خلق انی پادشاه کوتردیلر. بیر نیچه بیل لر اوتگندین سونگ شاه ملک یگیت بیتیشدی، اما ظالم بولدی، کیشی نینگ کورمکگه یخشی قیزی و خاتونی بولسه باقی، قوزیچی کوپ نصیحت لر قیلدی، قبول قیلیمه دی. ایل شاه ملک گه بیدادگر تیب ات قویدیلر. باره باره ایل بخشیری نینگ قیزلری و خاتونلریغه زور قیله باشله دی. ایرسه اوغوز ایلی بیغیلیب اولتورور بولدیلر، انی ایشتیپ آته سی قاتیغه قاچتی، قوزیچی بیک هم کینیدین کیتدی. تقی علی خان قاشیغه شاه ملک دین بورون باردی،



تقی بولغان واقعاتنی بیر بیر آیتدی. اندین سونگ شاه ملک باردی، علی خان شاه ملک نی توتوب قمچیلندی، تقی قولین باغله یب قویدی. مونی ایشتیب قوزیچی کیلدی. تقی خانغه مونی بندله تیب نه قیله ی دییتورور سن تیدی. خان آیتدی: اوغوز ایلینه بیباراین دییتورور من، تا اولرنینگ کونگی مندین راضی بولسون. قوزیچی آیتدی: اگر شاه ملک نی بیبارسنگ اولتورورلر، تقی مغرور بولوب سنینگ بیرلن یاغی بولورلر، هم اوغلونگدین و هم ایلینگدین آپرلورسن، تیدی. علی خان آیتدی: ایل نینگ روشی نی سن کوروب کیلیب سن، یخشی بیلورسن، اوزی نینگ اوخشرینی آیتقیل، تیدی. قوزیچی آیتدی: مصلحت اول تورور کیم من ایلگه ری باریب ایلگه سنینگ تیلینگدین عذر آیتاین، علی خان اوغلینی اوردی و قولین و اباقین باغلب، سن خلقة بیباردی. نی قیلورین خلق یخشی بیلور تیب، من ایلگه ری کیلیم، انی ایتاین تیب، اول منینگ سونگومدین نیز کیلور تیگه بین، سن برچه لشکرینگی اوغلونگه بیریب منینگ کتیمدین بیبارکیل، من انلرنی سوزگه یوباتیب تورگنده شاه ملک باریب یخشی لرین توتوب اولتورسون تا یامان لری حکمگه بویون قویغه ی، تیدی. علی خان هم بو ایشنی اوخسه تیب قیلور بولدی.

اوغوز ایلی نینگ علی خانغه یاغی بولوب شاه ملکنی اولتوروب، اویو باشینه قراخان بولوب تور طرفغه کیتگه نی نینگ ذکر

ایمدی شاه ملک قاجیب کیتگندین سونگ ایل نینگ قیلغانین آیه لی. اول وقتده اورگنچ و مرغاب و تجند ده اولتورغان ایل نینگ اولوغ بیکی «قای» ایلندین قورقوت تیگن ایردی. ایل ایچینه بیر خیلی بار ایردی. «میران کاهن» دیرلر ایردی. قورقوت بیکی انی چقیریب آیتدی: شاه ملک بیرلن قوزیچی بیکی بیزدین آغریب علی خان قاتیغه قاجیب کیتدی. ایل بیرلن خان نینگ ایشی نیچوک بولر ایرکن تیدی. میران کاهن بیر ساعت سوزله می اولتوروب تقی آیتدی: اوغوز ایلی نینگ ایچینه اوروش بولوب قیزیل قان قره سو تیک آقه تورور، علی خان نیز اوله تورور، انینگ اورنیغه بیر کیشی پادشاه بوله تورور، تیدی بو سوز تمام بولدی، ایمدی اوزگه سوزنی آیه لینگ.

بیر کیشی بار ایردی «توغورمیش» آتلی، آته سی نینگ آتی کراجه خواجه، قایی ایلندین، اویو بسه مه ی تورغان بارلی کیشی ایردی. بو واقعاتدین کوپ ییل لر بورون توغورمیش بیر کیچه یاتیب ایردی، توش کورر کیم کوکسیندین اوچ درخت کوکریب بلند چیقدی، تقی بوتاقلندی و یاپراقلندی، ایرته توریب باریب بو توشنی میران کاهن غه آیتدی. بو توشونگی هیچ کیمغه آیمه غیل، یخشی توش تورورو تیدی. توغورمیش نینگ اوچ اوغلی بار ایردی. هر اوغلی نینگ باشیندین خدا یولینه بیر قوی اولتوروب بیشیریپ خلقة بیردی. اولوغ اوغلی نینگ آتی «توتات» اورتنچی سی نینگ آتی طغرل و کیچی سی نینگ آتی ارسلان. قورقوت بیکی گه قرینتاش ایردی. اوچوسی تقی میرگن و بوکه ایردی. قورقوت بیکی طغرل نی اون بیگی قلیب، انی طغرل اون بیگی دیرلر ایردی. ایمدی شاه ملک نی آیه لینگ. قوزیچی بیکی علی خانغه شاه ملکنی منینگ کینمدین بیبارکیل، تیب ینگی کینت دین کیتیب اورگنچ ده اولتورغان ایلینگ ایچیگه کیلدی. اول وقت ده خلق طغرل نینگ آغزیغه قره تورور ایردیلر. طغرل قوزیچی غه آیتدی: سوزنینگ راستینی آیتقیل، یوق ایرسه قریغان چاغینگده ایسینگ کیتیب قین آستینده اولر سن، تیدی. قورقاندین راستین آیتدی. قوزیچی نی بند قیلدیلر، برچه ایل غه ایلچی بیباردیلر. اون آلتی مینگ کیشی بیغیلدی. شاه ملک نینگ کیله تورغان یولینه باریب قورقوت بیکی سکیز مینگ کیشی بیرلن یول نینگ بیر یانینده توروب، طغرل بیکی سکیز مینگ کیشی بیرلن یول نینگ بیر یانینده توردی، تقی اوزال قراول سالدی، بیر کون قراول کیله تورور تیب کیلدیلر. آتله نیب یول نینگ ایکی یانین آلیب توردیلر. شاه ملک نینگ لشکری بیگرمه مینگ کیشی ایردی، یریمی اوته بیرگنده ایکی طرفدین آت سالدیلر، اولوغ اوروش بولدی. طغرل غالب کیلدی، شاه ملک نی توتوب اولتوردیلر و بیکی لرینی هم اولتوردیلر. علی خان بو خبر نی ایشتگندین سونگ تیز اولدی. اوغوز ایلی بیریری بیرلن اوچلی و قانلی بولدیلر. اویو باشینه قراخان تیگن بولدی، بیریری بیرینی چاپدی و بیریری بیرینی اولتوردی و تقی قوتلوق بیکی و قران بیکی و قرمان بیکی باش بولوب کوپ ایل مانگقشلاق کیتدیلر. انلرنینگ ایچینه هر ایل دین بار ایردی، اما کوپراگی ایمیرو دوکر و ایگدیرو چاولدر، قریقن، سالور و آغار ایردی. علی جاق بیکی نینگ اوغلان لری باش بولوب حصار تاغیغه کیتدیلر و نیچه ایل لر اوقلی ایلی و کوکلی ایلی و آغار ایلی و سلطانلی ایلی ابوالخان تاغینه کیتدیلر، یازیر ایلی خراسانغه باریب درون اطرافینده کوپ ییل لر اولتوردیلر، اول سبب دین درون غه «یازیر یورتی» دیرلر، یازیر ایلی نینگ یر نیچه سی درون یقینینده تاغ ایچینه دهقانلیق قلیب اولتوروب ایردیلر. بو وقتده انلرنی



قراتاشلی دیبتورلر و تقی سالور ایلیندین «دینگلی بیک» باشلیق اون مینگ اوپولی خراسان باردیلر، تقی کوپ بیل لر انده اولتوردیلر، تقی اندین کوچوپ عراق و فارس باردیلر، تقی انده وطن توتوب قالدیلر. «قنق» اوروغیندین سلطان سنجر ماضی نینگ اته سی سلطان ملکشاہ باریب عراق و فارسنی آلیب اصفهاننی پایتخت قلیب اولتورغان و قتده سالور ایلی دینگلی بیک نینگ اوزی نینگ و اول بارغان جماعت نینگ نسل لریندین بیر نیچه کیشیلر کیلیب سلطانغه نوکر بولیب عرض قیلدیلر کیم بیز اوغوز ایلی، سالور خلقیندین تورورمیز، اولوغ اته لرمیز ترکستان دین کیلگن تورورلر، تقی قرینتاشلیق لرین معلوم قیلدیلر. اول سالور دین بیر نیچه سی عراق دین قیتیب مانگشلاق کیلدیلر، انلر نینگ نیچوک کیلگن لرینی تنگیم بویورسه آیتقوم تورور، انشاءالله تعالی. بورونقی اوتگن خلق آیتیب تورورلر، اوغوز ایلی کوچوپ کچیب یورومه دیک یول بارمو؟ اوپون تیکیب اولتورمه دوق یورت بارمو؟

توغورمیش اوغلی طغرل نینگ خان بولغانی نینگ ذکر

اوغوز ایلی نینگ شاه ملک بوزوقلیقیندین کیمته ی سیر سووینینگ ایاقینده و آمو سووی ده اولتوروب قالغانلری، توغورمیش اوغلی طغرل نی خان کوتردیلر، اول بیگرمه بیل پادشاهلیق قلیب وفات تاپدی و اندین سونگ توغورمیش نینگ کیچیک اوغلی ارسلاننی خان قیلدیلر، اول تقی اون بیل پادشاهلیق قلیب، کیتگن لر نینگ کیتیدین کیتدی. ایرسه انینگ اوغلی اصلزاده نی خان قیلدیلر، اول هم بیگرمه بیل دنالیق شرابینه اسره یوروب اوسروکلیدین آیلدی، ایرسه کوزین آجیب کوردی، اولوغ اته لرنینگ قاتینده یاتیب تورور. انینگ بیر اوغلی بار ایردی، اول اوغلانغه اولوغ اته سی نینگ آتین قویوب ایردی، ارسلان تیب، ارسلاننی خان قیلدیلر. اول تقی اون بیل اته سی بیرینده اولتوروب وفات تاپدی. اندین ایکی یاش اوغلان قالدی، اولغی نینگ آتی کوکم باقوی و کیچیکی نینگ آتی سرنگ. کوکم باقوی نی خان قیلدیلر، کوپ کیچیک ایردی، یخشی و یاماننی بیلیمس ایردی. اول زمانده اوغوز ایلی نینگ بیر یاغیسی بار ایردی - قراشیت آتلی. اول ارسلان خان نینگ اولگه نین و اندین یاش اوغلان لر قالغانین و انلر پادشاهلیق قیله بیلیمه ی، اوغوز ایلی نینگ آغیزی آله بولوب تورغانین ایشیتیب آتلندی. تقی کیلیب اردوسین و بیکلر نینگ اوپولرینی چاپدی، کوکم باقوی نی آت آلدیغه آلیب قاجدیلر، اول وقتده سرنگ بیشیکده ایردی. انی یاغی اولجه قلیب آلیب کیتدی. اندین سونگ کوپ بیل لر اوتدی. سرنگ بیگیت یتشگندین سونگ آقاسی کوکم باقوی کیشی بیباردی. من قاچه بیلیمه یمن، آقام کیلیب منی آله کورسون، تیب. منی ایشیتیب کوکم باقوی برچه اوغوز ایلی نینگ لشکرین آلیب باریب قراشیت نی چاپیب اینیسی سرنگ نی آلیب ایسن - امان اوپونه کیلدی. کوکم باقوی بیگرمه بیل پادشاهلیق قلیب وفات تاپدی.

ارسلان اوغلی سرنگ نینگ خان بولغانی نینگ ذکر

کوکم باقوی اولگندین سونگ اینیسی سرنگ نی پادشاه قیلدیلر. اول تقی اون بیل پادشاهلیق قلیب اته سی کینیدین کیتدی. اندین سونگ اوغوز ایلیندین پادشاه بولغانلر «قنق» اوروغیندین سلجوق بای باشلیق کوپ ایل کوچوپ سیر یقاسینده خجند شهرینه کیلدیلر، انده کوپ بیل لر اولتوروب نور ولایتیغه باردیلر، انده یوز بیل اولتوروب کوچوپ اورگنچ باردیلر. اورگنچ ده اولتوره بیلیمه ی کوچوپ خراسان باردیلر، تقی مرو دین ابولخانغه چه اولتوردیلر. اول وقتده خراسان سلطان محمود غزنوی نبیره لری نینگ قول لرینده ایردی. اولر نینگ دولت لری نینگ کاسه لری تولوب توکدی تیب تورغان وقت ایردی. سلجوقلر مرو شاهجهان شهرینی آلیب طغرل بیک نی پادشاه قیلدیلر، آلب ارسلان و ملکشاہ و سلطان سنجر ماضی مونلر شول جماعت دین تورورلر. اول پادشاه لرنینگ حکایت لرین بیزنینگ آیتماغیمیز حاجت ایرمس، بیز دین بورونقی اوتگن لر اول پادشاه لر نینگ نسب لرین بیان قیلماق اوچون چندان کتاب آیتیب تورورلرکیم انینگ حسابینی خدای تعالی یخشی بیلور. سلجوقلر ترکمن بولوب قرینتاشیمیز تیب، ایلگه و خلقغه فایده سی تیگمه دی. پادشاه بولغونچه ترکمن نینگ «قنق» اورغیندین میز دیدیلر. تقی پادشاه بولغان دین سونگ، افراسیاب نینگ بیر اوغلی کیخسرو دین قاجیب، ترکمن نینگ قنق اروغی نینگ ایچینه باریب انده اوسوب قالوب تورور، بیز انینگ اوغلان لری و افراسیاب نسلیدین بولورمیز تیب، اته لرینی سنب اوتوز بیش ارقه ده افراسیاب غه بیتکوردیلر.



اوغوز ایلی کوکم باقوی بیرلن سرنگ دین سونگ اوز باشینه پادشاه کوتریب اولتوره بیلیمه دیلر. اوغوز ایلی نینگ مانگ قیشلاق و ابولاخان ده اولتورغانلری، اورگنچ ده هر کیم پادشاه بولسه انغه تابع بولدیلر و خراسان ده اولتورغانلری خراسان ده هر کیم پادشاه بولسه انغه تابع بولدیلر. و ماورالنهر ده و هر یورنده اولتورغان لری شونداق بولدیلر.

سالور اوکوجیق آلپ نینگ آته لری نینگ و اینی لری نینگ و اوغلان لری نینگ ذکر

شاه ملک بوزوقلیغینده دینگلی بیک باشلیق عراققه بارغان سالور ایلی، کوپ بیل لر انده اولتورغاندین سونگ، اولر نینگ ایچینده «اوکوجیق» آتلی بیر توغیشلی بیگیت پیدا بولدی. ترکمن لر نینگ تاریخ بیلر تورغان کیشیلری اوکوجیق آلپ نی اون آلتی آرقه ده اوغوز خانغه یتکوزوب، مونداق سنب تورورلر کیم اوکوجیق آلپ آته سی قراغازی بیک، انینگ آته سی قراچ، انینگ آته سی بتم غازی، انینگ آته سی بوریجی غازی، انینگ آته سی قلال غازی، انینگ آته سی اینال غازی، انینگ آته سی سلیمان غازی، انینگ آته سی حیدر غازی، انینگ آته سی اوت کوزلی اورس، انینگ آته سی قزان آلپ، انینگ آته سی انکش، انینگ آته سی اندر، انینگ آته سی اتا، انینگ آته سی تیمور، انینگ آته سی سالور، انینگ آته سی تاغ خان، انینگ آته سی اوغوزخان. بو سوز محض غلط تورور. انینگ اوچون کیم اوغوز زمانندین تا بو وقتغه چه تورت مینگ و بیش یوز بیل یا آلتی یوز بیل بولوب تورور. اوغوز بیلن اوکوجیق آره سی تورت مینگ و تورت یوز بیل. اون آلتی آرقه تورت یوز بیل ده هر چند کوپ بولسه تورت یوز ایلیک بیل ده اوتر، پس اوکوجیق نینگ تورت مینگ بیل ده اوتگن آته لری نینگ آتی قنی؟

بو بیتیلگن اون آلتی کیشی اوغوز اوغلان لری ایرکنی راست و اوکوجیق نینگ آته لری ایرکنی هم راست، اما قیسی کیشی کیم ایل ایچینده مشهور بولسه، انی بیتیب تورور و غیر مشهور کیشی لرنی بیتمه یاتورور. خدای بیلور کیم بو بیتیلگن کیشیلر نینگ هر قیسی سی نینگ آره سینده اون بیش یا بیگرمه کیشی نینگ آتی بیتیلمه ی قالیب تورور. انینگ اوچون آیه تورور من کیم اوغوز بیرلن اوکوجیق نینگ آره سینده تورت مینگ و تورت یوز بیل کیچیب تورور، هر مینگ بیل ده قیرق آرقه اوتسه، کیره ک کیم ایکی یوز آرقه اوتگه ی ایردی، پس غلط تیگن نیچوک بولور؟ بو فلک نینگ گردشی نیمرسه لرین اونوتورمه غان تورور کیم بو انینگ قاتینده سهل تورور. بو سوز نینگ غلط لیقی ینه بیر وجه بو کیم سالور قازان نی آلتی آرقه اوتوب، بیتیلنجی آرقه ده اوغوز خانغه یتکوزوب تورورلر. ایمدی و سوزنی اوقوغان و تینگله غان کیشیلر یخشی فکر قیلینگ، اوغوز خان بیز نینگ پیغمبریمیز دین تورت مینگ بیل ایلگه ری اوتگن تورور، قزان آلپ بیزنینگ پیغمبریمیز دین اوچ یوز بیل سونگ ایردی، قریغان چاقینده مکه گه باریب، حاجی بولوب کیلیدی، پس سالورقازان آلتی آرقه ده اوغوز خانغه نیچوک بیتیر؟ و تقی سالور قزان قایی قورقوت آته بیرلن بیر زمانده ایردی، قورقوت آته نینگ سالور قازان آلپ نی مقتب آیتغان تارتیمی بو تورور:

قاز غورت تاغدین اونکر تاشنی بو غارلندی
سالور قزان اوترو باریب قریا توتدی
ایت بچه کوروب انی ایسی کیتدی
آلپلر، بیکلر، کوران بارمو قزان کبی؟
بیر قزان غه قیرق بیر آت نینگ ایتین سالدی
اول قزاننی سول ایلیکی بیرلن آلدی
ساغ ایلیکی بیرلن ایلگه اولشتیردی
آلپلر، بیکلر، کوران بارمو قزان کبی؟
کوک آسماندین اینیب کیلیدی تینلی ییلان
هر آدم نی یوتر ایردی کورگن زمان
سالور قزان باشین کیسدی بیرمه ی امان
آلپلر، بیکلر، کوران بارمو قزان کبی؟



اوتوز قیرق مینگ لشکر بیرلن قزان باریب
 ایت بچنه ایل لرینی، کیلدی قیریب
 بیر نیچه سی قوتلدیلر کوپ یالباریب
 آلپلر، بیکلر، کوران بارمو قزان کبی؟
 تورک و ترکمن، عرب، عجم رعیت لر
 قزان قیلدی مسلمانغه تربیت لر
 کافرلرنی قیردی اوشول کوپ فرصت لر
 آلپلر، بیکلر، کوران بارمو قزان کبی؟
 اندین هنر کوتردیلر برچه اولی
 بعضی لرگه اورین بیردی ساغلی سوللی
 بیزگه بولدی قموغ ایلینگ اورنی دینگلی
 آلپلر، بیکلر، کوران بارمو قزان کبی؟
 سیاح قورقوت اولر بولدینگ ایمدی بیلگیل
 اول قزان نینگ دولتینه دعا قیلغیل
 کاروان کیتدی کوپ کیچ قالدینگ یولغه کیرغیل
 آلپلر، بیکلر، کوران بارمو قزان کبی؟

ایمدی اوکورجیق نینگ حکایتین آیتالینگ. اول زمانده عراق نینگ کوچلی خلقی بایندر ایلی ایردی. اوکورجیق آلپ بایندر بیکی نینگ حکمینی توتمه دی، بایندر بیکی اوکورجیق بیرلن یامان بولدی. اوکورجیق نینگ بایندر بیرلن اوروشغو تیک قوتی یوق ایردی. مینگ اویولیک ایلی بیرلن عراقدین قاجیب شامغه کیلدی، توقوز اویولیکی قرقین ایردی، انده هم اولتورغه لی بایندر دین قورقوب قیریم کیلدی. اندین کوچوب اتل سووینی کیچیب یاییق سووینه کیلدی. اول وقتده آله کنگ و قره قاش تیگن بیرده قانقلی خلقی اولتوروب ایردی، انلر نینگ خان لری نینگ آتی کوک تونلی تیگن ایردی، انینگ قاتیغه کیلیب بیر نیچه ییل لر اولتوردی. عاقبت انینگ بیرلن هم یامان بولوب کوچوب قاجتی. کوک تونلی کینیدین بیئتیب ییتی یوز اویولیکین آلیب قالدی. اوچ یوز اویولیک بیرلن قاجیب مانغیشلاق باریب، قره خان تیگن بیرده اوچ ییل اولتوردی. کوک تونلی اوکورجیق نینگ قیده کیتگه نین بیلمه ی تورور ایردی، اوچ ییل دین سونگ ایشتیب آتلندی، آنینگ آتلغانین اوکورجیق ایشتیب ایلی بیرلن قاجیب قورتولوب ابوالخان تاغیغه باردی. اول وقتده اوکورجیق نینگ آیتغان تارتیمی بوتورور:

دوندوم قاجیب قانقلی خاندین قبله سوردوم
 قریل آشی کیلگن ار اونگیندین دوندوم
 قرچی لرگه یول باشلاندوم
 قایلی قارلی ایکی قوله یول یومشانندوم
 ارقیت ارقیت قیرلرغه تورجم سالدم
 آرت اونگومه بیزگه سالیب کوچوم تارتدوم
 قیراتیمده تاغ یولیندین آشیب باردوم
 قباقلیدین النجه یورت یورتلاندوم
 گوریلداشیب آرتیمدین یاغی بیتدی
 قایلی باشلی قاتیب پای غه ایش بویوردوم
 قانلی ایرنکلی قلیینگ اوقیغه قان یورکوتدیم
 چاپسه کیسر قورچ پولاتغه توغ اغلاتدوم
 قیلچیم سیریب بیل اکشامده قویی قازدوم
 آوا قیشلب قیرده یایلیب بالقان آشدوم
 اکسه یاسین قرا تاققه اوغراب کیلدوم
 قانقی گروه توی توشمه دی انده بولدوم
 آلتون کوزلی تیوشقانی کیتوردی تیب
 قاز ایاغی اوچ ایری تامغه بیردوم



قراغازی بیک نینگ تورت اوغلی بار ایردی: اول اوکورجیق الپ، ایکینجی سوارجیق، اوچونجی دودوق، تورئونجی قباحیق، بو تورتی نینگ اوغلان لری تنگرم بویورسه بیر بیر آیته لینگ: اوکورجیق نینگ آلتی اوغلی بار ایردی، هر ایکسی بیر ایکیز بولوب، ات لری بو تورور: بیردی و بوقا - بیر ایکیز، اوسار و قوسار - بیر ایکیز، یایچی و دینگلی - بیر ایکیز. بیردی نینگ ایکی اوغلی بار ایردی، بیرى نینگ آتی قلمی و بیرى نینگ آتی قول حاجی. قلمی نینگ اوغلان لری یموت و قولتاق ایلی تورور. اما یموت نینگ ایکی اوغلی بار ایردی. بیرى نینگ آتی اوزلی تیمور ایردی و بیرى نینگ آتی قوتلی تیمور، اما اوزلی تیمور نینگ اوچ اوغلی بار ایردی، آتلى بو تورور: عیسی، موسی و بهرامشاه. قوتلی تیمور نینگ اوچ اوغلی بار ایردی، آتلى بو تورور: چونی، شران و قوجیق. قول حاجی اوغلی ارساریب ای انینگ اوچ اوغلی بار ایردی: اینال غازی، زین الغازی و مصطفی غازی. اینال غازی نینگ ایکی اوغلی بار ایردی: بیرى نینگ آتی توره و بیرى نینگ آتی سوقمان، لامبه و چارشانگی بو ایکى سی نینگ اوغلان لری تورور. زین الغازی نینگ اوغلانلری - قره و بکاول تورور. مصطفی غازی نینگ اوغلان لری - اولوغ تپه و گونش تورور. بوتا اوغلان لری - ایچیکی سالور تورور و ینه بیر نامه ده مونداغ دیمیشلر کیم سالور ایلینده بیر کیشی بار ایردی «- انکش آتلى. خاتونی نینگ آتی «جیجاقلى»، اوغلی نینگ آتی قازان، سالور قازان آلپ تیگن اولتورور. اول زمانده بچنه ایلی نینگ بیر پادشاهی بار ایردی، تویمه دوق آتلى، اول کیلیب انکش نینگ اویون چاپیب جیجاقلىنی اسیر ایتیب آلیب کیتدی. اوچ بیل دین سونگ انکش مال بیریب انی قایته آلدی. جیجاقلى اویگه کیلگندین آلتی آی سونگ بیر ایرکک اوغول تاپدی. قازان آلپ آنه سینه بو اوغلانی سن قیدین آلدینگ تیب یغاچ بیرلن اوروب باشین یاردی. جیجاقلى آیتدی: یاغی کیلدى، قراریب قاجیب کیتدینگ، بوزه ریب تیوه گه مینیب کنینیدین بارور ایردیم، قباریب ایت بچنه ایزیمدین بیتدی. تیوه م نینگ باشین توتدی، ایچی قاینه دی، تاشی یاینه دی، اوستیمگه مینیب اوینه دی، اختیاریمنی آلدی، بو اوغلاننی ایچیمگه سالدی، تیدی. اول اوغلاننی ایت بچنه ایلیدین بولدی، تیب آتینی ایرک قویدیلر. ترک ایچینده رسم بو تورور، ایت نینگ آتینی ایرک سرک قویماق. ایرک نینگ بیر لوغلی بار ایردی - آریقلی آتلى. ایچیکی سالور آریقلی نینگ اوغلان لری تیب تورور لر. اول زمانده بیز یوق ایردوک، چنین و یالغانین خدای یخشی بیلور، اگر یالغان بولسه گناهی بورونقی آیتغان لر نینگ بوینیغه.

اوسار اوغلان لری - تراکمه سالور تورور. دینگلی اوغلان لری جایی خلقی تورور. یایچی اوغلان لری بو وقتده آمو سووی نینگ یفاسینده قره کول یقینینده اولتوروب تورورلر. بو چاقده هم انلرنی یایچی دیتورورلر. اوکورجیق نینگ بیش اوغلی نینگ نسلینی بیان قیلدوق، اما قسار آتلى اوغلیندین نسل قالغانی معلوم ایمس. ایمدی اوکورجیق نینگ اینی لری نینگ نسلین بیان قیله لینگ.

سوارجیق نینگ بیر اوغلی بار ایردی «خورشید» اتلى، اولام، اورگنچلی ایل خورشید نینگ اوغلان لری تورور. ازلاز اوروغی دودوق نینگ نسلی تورور، سقر ایلی قباحیق نسلی تورور. اوکورجیق نینگ اینی لری و اوغلان لری نینگ نسل لرینی آیتدوق. ایمدی اوزگه ایل لرنی ایتالینگ: آغار و ایمیقی ایلی اویغور ارقیل خواجه کیم اوغوز خان نینگ اوغلی گون خان نینگ وزیرى ایردی، انینگ اوغلان لری تورور. ایمیر ایلی نینگ اصلی مونداق تورور کیم مانگ قیشلاققه ایچیکی سالور دین بیر کیشی بیر ایچیکی سالورنی اولتوریب قاجیب درون ده اولتورغان سالور ایچینه کیلیب تورور، تقی انلریدن بیر قیز آلیب انده وطن قیلیب اولتوروب تورور، برچه ایمر ایلی، خلقی اول کیشی نینگ اوغلان لری تورورلر. بورقاس سالور ایلینده تیمورتوغلی خان تیگن بار ایردی بو تقی سالور دین اسیق اسماعیل آتلى بیر کیشی بار ایردی، بیریر دین کیله تورور ایردی، کوردی ایرسه، تیمورتوغلی خان نینگ ایوی کوچه تورور ایردی، توشوب اولتوردی، کوچ اوزاب کیتگندین سونگ شاید بیر نیمرسه قالغان بولغای تیب، یورته باردی، ایرسه اوجاق ایچینده بیر یاش ایرکک اوغلان یاتیب تورور. اول کیشی نینگ اوغلان یوق ایردی، انی اوزیگه اوغول قیلیب سقله دی و آتینی «بورقاس» قویدی. برچه بورقاس ایلی انینگ نسلی تورورلر، سالور ایلینده بیر کیشی بار ایردی، توی توتماز تکه و ساروق ایلی انینگ اوغلانی تورورلر.



سونگ ترکمن بولوب ترکمن گه قوشیلغان ایل لر نینگ ذکرى

ایسكى اول زمانده کیم اورگنچ ده ابولخان و مانگ قیشلاق اوزبیک خان نینگ اوغلى عادل جانی بیک خانغه تعلق ایردی، جانی بیک خان اویغور «سانیقلى ساين» تیگن نی ترکمن ایچینه بیباردی تا اولر نینگ عیلى و گناهکارلرین سورسون تیب، اول کیلیب ایل ایچینه بیر ییل توردی، هر بیرده گناهکار و عیلى بولسه، سورای تورور ایردی، نوکری و قول لری کوپ ایردی. ایاز اتلی بیر قولی بار ایردی، برچه قول لریدین پیشقدم اول ایردی. ترکمن نینگ گناهکار لری کیم باشمیدین و مالیمدین آیرولور من تیگن لری برچه سی بیر بیرگه ییغیلیب ایازگه کوپ رشوت لر بیریب آیتدیلر کیم اگر سن بیکینگنی اولتورسنگ، بیز ایلدین آغان مال لرنی و اویو دین کیلتورغان قوشینی برچه سین سغه بیره لینگ. هر قچان جانی بیک خان کیشی بیباریب سنی تیله سه، بیز خلق سنینگ اوچون قیریله یلی و یوقه له لی، سنی توتوب یرمه لی، تیدیلر. ایاز کوپ مالغه و بولر نینگ شیرین سوزینه کونگلینی بیریب بیرکیچه غافل یاتغانده «سانیقلى ساين» نی اولتوردی. خواجه سی نینگ مالیندین ایاز غه بیر اوغلاق هم تیگمه دی. هر بیر غه قویغان مال لر غه کیم یقین بولسه، انلر تیلب آلدیلر. سانیقلى ساين نینگ نوکرلری جانی بیک قاتیغه قیتیب کیتدیلر. ایاز قورققانیدین کینه بیلمه ی ابولخان تاغیده اولتورغان ترکمنلر نینگ ایچینه قالدی. اوشول ییل جانی بیک خان اتل سووی نینگ یقه سینده «سرای» شهرینده حق رحمتیغه کیتدی و برچه ایسكى خلقی شول ایاز نینگ اوغلان لری تورور. خضر ایلی.

سالور ایلیندین ابولخان ده آرساری بای تیگن بار ایردی، اوزاق عمر تاپقان دولتی و مسلمان لیقه کوشش قیله تورغان کیشی ایردی. بو سوزیمیز نینگ دلیلی بو کیم اول زمانده اورگنچ ده بیر عزیز کیشی بار ایردی «شرف» اتلی، شیخلیک مسندینده اولتورغان و هم ملا ایردی. آرساری بای باریب شیخ مذکورگه قیرق تیوه نیاز بیریب عنایت قیلیب التماس یوزیندین عرض قیلدی کیم بیز ترک خلقی تورورمیز، عربی کتاب لرنی اوقوب معنی سیگه یتیشیب عمل قیلماق بسی مشکل بوله تورور. اگر عربی مسأله لرنی ترکی ترجمه قیلیب عنایت قیلسنگیز ایردی، ثوابگه شریک بولور ایردینگیز، تیدی. ایرسه شیخ شرف خواجه تقی برچه مسأله دینی نی ترجمه قیلیب بیر کتاب اییتیب «معین المرید» آت قویوب آرساری بايغه بیردی. اول وقتدین تا بو کونغه چه برچه ترکمنلر اول کتاب نینگ مسأله لر یغه عمل قیله تورورلر. اول وقتده ایران پادشاهی خراسان نی «قماییک» تیگن غه بیریب ایردی. اول خراسان کیلگندین سونگ ایشیدنی کیم ابولخانده آرساری بای نینگ «ماما» اتلی کورکلی یخشی قیزی بار ایرمیش تیب، کیشی بیباریب کوپ مال یرایین تیب تیلندی. بای بیرمه دی. بیرمه سین بیلگندین سونگ قما بیک کوپ چریک بیرلن آتالایب ابولخانده «دوکر» تیگن قودوقده آرساری بای نی شهید قیلیب، ایلینی چاپیب ماما بیکه نی آلیب باریب نکاح قیلیب کوپ ییل لر سقله دی. ماما بیکه دین هیچ اوغلان بولمه دی. اول سبب دین آرساری بای نینگ اوغلان لر یغه کیشی بیباردی، قرینتاش لرین آلسون لر تیب، بولر قولتاق خواجه میرگن تیگن نی بیباردیلر. قما بیک، ماما بیکه گه کوپ مال بیریب قره جه میرگن گه تاپشوروب بیباردی. بیر ایولی قول تقی بیریب ایردی. اول قول نینگ تورت اوغلی و ایکی قیزی بار ایردی، اولوغ اوغلی نینگ آتی خضر و ایکینچی اوغلی نینگ آتی علی و اوچونچی اوغلی نینگ آتی ایک بیک و تورونچی اوغلی نینگ آتی قشقه. ماما بیکه قرری بولغاندین سونگ مال لری نینگ برچه سینی خدای یول یغه بیردی. قما بیک بیرگن قول نینگ اوزی و خاتونی اولوب ایردی، تورت اوغلی و ایکی قیزی آزاد قیلیب بیباردی. تورتوسی هم ایولی و کوپ ماللی کدخدالر بولوب هر قیسی بیر یرده اولتوردیلر. خضر جوره آمو سووی نینگ یقه سینده گردش تیگن یرده ایکین ایکیب و هم چارپادارلیق قیلیب اولوغ بای بولدی. اول وقتده اوزبیکنی مغول دیرلر ایردی. تورت مغول کلیب خضر جوره غه یتیم بولوب مال لرین باقدی. اندین سونگ آتی سالور کیلیب یتیم بولدی. انلر نینگ برچه سی دولتمند بولدیلر، اطراف و جوانب دین آج - آریق و چاپدورغان و آلتورغان کیلیب بو لر غه قوشولوب اولتوردیلر، کوپ ایل بولدیلر. انلر نینگ یورت لری نینگ یوقاری سی تون قوی و ایاغی قری کیجت ایردی. هر کیشی انلردین نی خلق سیز، تیب سورسه خضر بای نینگ کیشیلری بیز، دیرلر ایردی. باره باره خلق انلر غه خضر ایلی تیدیلر. خضر ایلینده بیر اوروغی بولور، انغه کورتلر دیرلر و انلر خضر جوره نینگ نسلیندین تورورلر. ایمدی خضر نینگ اینیسی علی نی آیه لینگ. علی جوره تقی آقاسی تیک آمو سووی نینگ یقه سینده یورت توتوب اولتوردی و دولتی بولدی. اوزبیک و ترکمن نینگ فقیری و مسکینی انینگ قاتینده اولتوردیلر. انلر نینگ برچه سیغه «علی ایلی» تیدیلر. علی ایلی نینگ ایچینه بیر اوروغی بولور، مغول جیقلر «تیگن، انلر علی جوره نینگ نسلیندین تورورلر. اولر نینگ یورتی آمو سووی نینگ ایکی طرفینده یوقاری سی قری کیجت، ایاغی آق تام. اوچونچی اینیسی ایک بیک آزاد بولغاندین سونگ



ارساری بای اوغلان لری نینگ قاتیندین ایریلیب، اوزگه بیرگه کیتمه دی. انینگ اوغلان لریغه «قول لر» تیدیلر. انلر هم ایکی بولک بولدیلر: یریسینه «قول لر» دیرلر و بیرسیغه «چغتای قول لر» دیرلر. چغتای دیمک نینگ معنیسی اول تورور کیم خراسان تیموری لر نینگ اولادی نینگ قولینده ایرکان ده اولوغ تپه خلقی ابولخاندۀ آمو سووی نینگ یقه سینده اولتورغان ایرکان تورورلر، آمو سووی نینگ قبله طرفیندین بیر کوک آتلی کیشی کیلیب فریاد قیلیب آیتیب تورور: منی اوتکه زینگلر، تیب. اولوغ تپه لر کیمه بیباریب اوتکه زیب سورپ تورور لر: کیم بولورسن و قیدین کیله تورور سن تیب، اول یگیت آیتیب تورور: چغتای نینگ ارلات تیگن اوروغیدین بولور من. بیر کون خراسان نینگ درون تیگن ولایتینده بیر نیچه یگیت لر بیرلن شراب ایچیب اولتورور ایردوک، ایچیمیز ده بیر یخشی کیشی بار ایردی. اول منینگ بیرلن اوروشتی، من انی بیچاق بیرلن سنجتیم، اول کیشی شول زمان اولدی، کیچه ایردی، اولگه نین قرینتاشلری خبردار بولمس دین بورون قاجیب سیز نینگ خلقتی تیب کیلیب من، تیدی. تقی کوپ بیل لر اولوغ تپه ایچینده یوردی، هیچ کیشی انگه قیز بیرمه دی. آخر ایک بیک جورۀ نینگ اوغلان لریندین بیرسی انگه قیز بیردی. اندین توققان لرغه «چغتای قوللر» تیدیلر. تورونچی قشقه جورۀ، اول تقی آمو سووی نینگ یقه سینده آجی تینگیز نینگ یقینینده یورت توتوب اولتوردیلر. انینگ اوغلان لریغه «قراویولی لر» تیدیلر. اولوغ آقارلی تیک دولتلی بولوب مونینگ قاتیغه هیچ کیشی قوشولمه دی. انینگ اوچون اولتورغان بیر یامان ایردی، ایکین ایکر بیر یوق ایردی، مال و اولتر اوتی هم آر ایردی. تیوه چی ایلی ساین خان اولادیندین اول کیشی که مسلمان بولدی، اوزبیک خان علیه الرحمۀ ایردی. اول اتل سووی نینگ یقه سینده سرای شهرینده وفات تاپدی. اوغلی جانی بیک خان آتۀ سی تختینده اولتوردی، اورگنچ و باشی قارغه لی ایلک و ایاغی استرآباد غه چه اولتورغان ترکمن، جانی بیک خانغه تعلق ایردی. خانغه آیتدیلر کیم ابولخان تاغی تیوه اوسگه لی عجایب یخشی یر تورور، تیب. بو سبب دین خان اوتوز ایولی سارباننی کوچوروب ابولخان تاغینه بیباردی. انینگ ایچینده هر اوروغدین بار ایردی. برچه غه معلوم تورور کیم پادشاه لر خدمتینده هر طایفه دین بولور. انلر هم شونداق ایردیلر، جانی بیک خان نینگ بیر کیشی سی ابولخان ترکمنیغه کیلیب هر بیل ده آله تورغان مال لرین آلیب کوپ تیوه نی اینیلغان اوتوز ایولی تیوه چیغه تاپشوروب قیتر ایردی. تا جانی بیک خان اولگونچه ابولخان ده اولتوردیلر، انلر غه «تیوه چیلر» تیدیلر. جانی بیک خان هم حق رحمتیغه باردی و اوغلی بیردی بیک خان بولدی. انینگ زمانینده هم تیوه چیلر خانلیق تیوه نی باقیب اولتوروب ایردیلر. بیردی بیک خان اولگندین سونگ اوزبیک نینگ ایچی بوزوق بولدی. انی ابولخان ترکمنی ایشیتیب خان نینگ تیوه لرین تله دیلر، تیوه چیلرنی چاپتیلر، اندین سونگ تیوه چیلر آچلیق سببندین بلیق اولرمیز تیب، قشقه جورۀ نینگ اوغلان لری قرا ویولی لر قاتیغه باریب اولتوردیلر. بیر نیچه بیل دین سونگ تیوه چیلر کوپ خلق بولدیلر. انلر نینگ یورت لرینینگ یوقاری سی آق تام، ایاغی اوغورجه ایردی. قراویولیلر تیوه چیلر ایچینده کوپ آرقه اولتوردیلر. انلریدن خلیل آتلی بیر توغیشلی بیگیت پیدا بولدی. اول وقتده قراویولی لر بارلی بولوب ایردیلر. اول سبب دین خلیل باشلیق برچه سی ارساری خلقی نینگ اون بیکی و یخشی لری نینگ آلدیغه کیلیب آیتدیلر کیم اوزینگیز خدمتکارلرینگیز ایردوک و کوپ آچ و آروق بولوب تورورمیز، سیزلردین اتونو میز اول تورور کیم اولوغ ابولخان و کیچیک ابولخان تاغی نینگ قوشلرین و ایکین ایکه تورغان چشمه لرین بیزگه بیرینگیز، سیز هر نیمرسه تیسنگیز، هر بیلده انی بیز سیزگه بیرۀ لینگ، تیدیلر. ارساری یخشی لری بیغیلیب اولتوروب آیتدیلر کیم اولوغ آتۀ میز ارساری بای ساتقون آغان اولوغ ابولخاندۀ آلتی آقر چشمه اون اوا لاجین و اون سکیز ایوا ایت آغور و کیچیک ابولخاندۀ تورت ایوا لاجین و آلتی ایوا ایت آغور بار تورور. چشمه لردین هم نی چاقلی اشلیق حاصل بولسه انینگ یارین بیزگه بیرینگ و تقی اران تیمک اوچون ایکی مینگ قمیش بیرینگ. اون اولوغ لاجین و تورت جره لاجین و اون سکیز اولوغ ایت آغور و آلتی ساریجه هر بیلده کیلتوروب بیرینگ تیدیلر. قراویولی خلیل قبول قیلدی و تقی ابتدی کیم بیز نینگ قوشلرین آغۀ لی اورغانیمیز یوق و آذوقیمیز یوق تیدیلر. اون بیکی و یخشی لر ایلدین بیغیب ایپ ایشتوروب یوز قولاق ارغمچی و آلتی اوغلاقی ایچکی و ایکی تولیم جوکالیک و بیر ایشک بیردیلر. انلر کوپ بیل لرغه چه بو آیتیلغان نیمرسه لرنی بیرور ایردی. بو وقتده انلرنی «تاغ سقری» دیتورورلر، انینگ اوچون قشقه جورۀ نینگ اوغلان لری تورور، قشقه بیرلن سقری نینگ معنی سی بیر تورور.



اوغوز ایلینه بیکلیک قیلغان قیزلر نینگ ذکرى

ترکمن نینگ تاریخ بيله تورغان یخشیلری و بخشیلری آیتیب تورورلر، یتى قیز برچه اوغوز ایلینی آغزینه باقدوروب کوپ ییل لر بیکلیک قیلدیلر. انلر نینگ بیرىسی آلتون کوزلی سوندون بای نینگ قیزی و سالور قزان آلپ نینگ هلیی، بویى اوزون بولر ایردی. اکینجی قارمیش بای نینگ قیزی و مامن بیک نینگ هلیی، بارجین سالور ایردی. انینگ قبرى سیر سووی نینگ یقه سینده تورور و خلقة مشهور تورور. اوزبیک انغه ارجین نینگ کوپ کلشانه دیر، کلشن کارلی یخشی کنیز تورور. اوچونچی قایی بای نینگ قیزی و چاولدر آلپ نینگ هلیی شاباتى ایردی. تورتونچی قوندی بای نینگ قیزی بیاکان آلپ نینگ هلیی کونین کورکلی ایردی. بیشینچی یوماق بای نینگ قیزی قرقین قوناق آلپ نینگ هلیی تقی بیر کونین کورکلی ایردی. آلتینچی آلپ ارسلان نینگ قیزی کستان قره آلپ نینگ هلیی کرجه بولادی ایردی. یتتچی قنق بای نینگ قیزی دودال بای نینگ اوغلی - قیماچ نینگ هلیی «قوغادلی» ایردی.

تاریخ مینگ تقی یتمیش بیر ده خوارزم ملکینده تحریر تاپدی.
تمت کتاب بیتلیدی

قال النبی علیه السلام : القلم عز الدنيا و شرف الاخره.





تیارلان: آی-کتاب

ay-kitap.com

